

MARA EVANGELICAL CHURCH

APAHRANA CHHIHTHANA BU

2020

ZISU LEIPA TA HRO HE KHÂPA HRAOLEIPA A CHÂ

Pachhuapanotuhpa

Rev. Victor VE U

**APHRANA CHHITHANA BU
2020**

Copy Right @ 2020 by
Mara Evangelical Church

Design & Layout
Pa Hmo (*Alpha & Omega*)

Author
Rev. Victor Ve U

Published by
Evangelism & Mission Department
MARA EVANGELICAL CHURCH
Headquarters: Lailenpi/Sabawngpi
Matupi Township, Chin State
Myanmar

ACHHÔHBIEZY

Achuna	Page
Biehmiapa	<i>i</i>
Châbu rotuhpa Biehmiapa	<i>ii</i>
1. Khazohpa awna	1
2. Khazohpa liata thlalôhpa ta charei suh vy	4
3. Zisu cha Khazohpa phapa a châ	7
4. Reipachhiena cha Khazohpa pahno kheina ngiana a châ	10
5. Thlahchhâna	13
6. Eima hmiapa liata arâpasuana awpa	16
7. Zisu eima ngiapâna taotuhpa & pakituhpa	19
8. Khazohpa Bie deita	22
9. Pathaihna	25
10. Ngiapâna Pachyupa & Khopasana eima peimawh ...	28
11. Zuah ta, chalei haw ta	30
12. Taotuhpa Khazohpa miah tao chhâna	33
13. Khazohpa Bie cha hro ta hmo a tao	35
14. Thlâkhaoh kiah liata chyhsa zydua miakha eima châ	38
15. Avâ opy a châ he zaw	41
16. Theiku thaby liata na y nona kha ei cha hmô mâtâh	44
17. Pasaipha	47
18. Hnôh sy lei ta tôh lymâ suh vy	50
19. Zisu lia deita pachhana a y	53
20. Zisu pathlatuhpazy hry ta nôzy	55
21. Thina taih ngâchhihpa ta chakaona	57
22. ABeipa liata nata a thatlôna liana chata Hmotaotheina Hneipa ta y teh u	60

Achuna	Page
23. Ei ngiachhiena na châta â daih	62
24. Tha na patlôtuha liata ato ei tao thei	64
25. Kresawti cha a daih khao leipa ta	67
26. Thâtiha vâta ryu tona	68
27. Atahmâ he Khazohpa saw eima châ	70
28. Khazohpa peina a hria tlamaw hawpazy	73
29. Khazohpa ao	77
30. Thlahchhâ chyh-eina	80

BIEHMIAPA

Mara Awnanopa ta September thla (Thlarâh) liata Thlahpa lâ kyh liata Hla nata Bie, Thlachhâna ta eima Awnanopa pahrana he



Awnanopa ta a thôhkhei kawpa chakaona a châ. Chavâta apahrana he eima thlahpa lâ hmo thatlôna dei châleipa ta eima Mission chakaona liata tha miah patlô kawpa avaw châ. Eima Mara Awnano Assembly he ta, Apahrana a thôhkhei kawpa vâta Châbu ta tao ta Awnanopa Local yna maih zydua

liata ahmâna hawhta tao ta, atakô 2020 September a pahrana chhao he eima Awnanopa Ryureina asâh chaipa Assembly ta eima Pastor-zy hry liata Senior chaipa nata Châ arohthai chaipa Rev. Victor Ve U he Apahrana Chihthana Bu ro awpa a hnawpa hawhta aly kawpa ta Châbu avaw ro theipa vâta ano pôhkha chô liata Krista Moh ta Alyna bie vaw hlâ pi ta, chahawhta Local to ta, he Apahrana Bu avaw hmâtuha zydua chhao eima Khazohpa ta ano Chakaona nata A khinarâh kawh n'awpa châta byhnâ pie maw sy! Amen.

Rev. A. Rakhai

Executive Secretary

Mission & Evangelism Department

CHÂBU ROTUHPA BIEHMIA

2020 Thlarâh thla Apahrana Chhithana Châbu taona tovyuh Assembly ta eina chhai heihpa vâta ei ly ngâsâ. Atahmâ ta châbu chhao he Apahrana châta ei (3)na eivaw ropa a châ. A chhoh bie he Rev. Haidau Sermon taopa tawhta la viapa châ ta, ano chô liata chhao ei ly ngâsâ. Pahrana Bu rona dâh chhao he ei vaw panano haw hra. Khazohpa bie pahnona liata hneirôhna hlâta Khazohpa bie palôhrupa lâ liata ângia thei via n'awpa he eivaw chhuah chaipa a châ. He vâta mo pakha testimony hawhpa tha ta eivaw ro.



Thâtihzy eivaw chuna liata bie hiahrina he tha ta ama pahâpa vâta, kei chhao pachâ awpa he daihti vâro lapa ta eivaw ropa a châ. AhmâtuHPa nata a theituhpa nama zydua chô liata Khazohpa ta byhnâ cha pie mawh ei sy.

Rev. Victor Ve U

24th March 2020



Achuna (1)

KHAZOHPA AWNA

Atahmâ ei palôhrupa nô a po. Kheita ei tah aw?" Ei paw y, he daihti liana he ta na pachha teh, ei tah aw ma? Châ vei, khâparai châsala he ta châ awpa he ta, he daihti taihna he ta ei y chhâpa a châ" Zawhana 12: 27.

Zisu Krista ta he bie a reipa he, Paw Khazohpa a tua chhâna a pahlei leina nata Khazohpa ta atuana maih liata khatinoh rai ta kheihawhpa daihti liata chhao rai a mâ chiehpa ta a yna a palâsa. He thâtih nata azaopa ta thâtihpha reituhpa moh pathâhpa Billy Graham (Bili Karaham) thâtih tawhta eimâ vaw chu tua aw. Evangelist, atanoh taihta chyhsa hluhchai Thâtihpha a chho theipa a châ. USA Carolina State, Charlotte kih liata a pih. Khâpa vâta e, Khazohpa ta Charlotte khitawpa lia tahpa Billy Graham cha Evangelist rôhnapa ta â aw tly? Khazohpa reingiapa ta a hlâna nata thâtihpha chhopa ta â mânazy vâta a châ. Billy Graham ta Khazohpa ta a tuana maih liata, "he liata ei y na tua la," a tah thei.

Billy Graham pipathina he 1934 kô ta South America Baptist Evangelist Dr. Modesai Follaham ta Charlotte kih thâtihpha a chakaona tawhta a châ. Dr. Modesai ta Billy Graham saku a kia lâhpa high school student thokha

hrozie chhiepa zawpi liata a phuahpa vâta saku hawti zydua a paraoh ei ta, Dr. Modesai thâti hpha chhopa nahthliena rypaohpa a hnei. Thlahpa Pathai hpa ta a moleipazy a pahnosana Thâti hpha nahthlie pazao khohna hnei ta, a nahthli pazao lymâ nota, a hro â vaw nano haw. Thâti hpha chhopa ta Khazohpa awna a vaw pahno ta, thâti hpha a chho pathao.

Nohkha tawh nohkha Billy Graham chakaona a tlaichhaipa vaw pôh lymâ eita, khizaw pita ama pahnopa, ama tlaichhaipa a vaw châ haw. North Korea, China nata Rusia râhzy taihta Billy Graham châta thâti hpha chho awpa ochhi pahypa ei ta, Liberalzy (*Achuna asâhpa Pastor hluhpi*) taihta a thâti hpha chhopa khoh eita, ananona (*moleipazy nata moleina kyh liata anano eihrâhna*) a papeisa tuhpa deikua pahua via'pa ta âmâ haw. Politician hluhpi ta ama hnôhky liata Billy Graham a dua lâhpa khoh eita, lymâ hluhpi piepa ta ama chhopasuapa chhao khoh vei. Thokha ta a chiehleina kaozy tluapa ta ama reipachhie, kawhkha chhao reipachhie hri leipa ta, palôh pasipa ta nathlie eita, a chiehleinazy padona ta a hmâh.

Kô hluhpi Billy Graham a vaw chakaolâhpa Sherwood Elliot Wirt ta, "Kraws tawh pathao leipa ta, Billy Graham thâti h ro thaipa châ vei. Kraws thâti h cha Billy Graham chakaona a châ," a tah. Billy Graham Thâti hpha liamarieh cha Kraws thâti h a châ. Billy Graham a husona hnôhchaipa ta khizaw zawpizy lâta bietana hnôhchaipa a reipa cha, "ABeipa liata khâ aly teh u", tahpa a châ.

Pachâ awpa:

1. Khazohpa ta athaipa asopa, asaomâpazy hlâta, “he liata ei y, na tuah la,” a tahpazy a hmâ khoh via tahpa he nâ pyh mâ?
2. Khazohpa ta awna nata a hlâna tlokhuh y tlôh leipa ta, Mission chakaona raihria he hria mawh ei si la, kheihawhpa chhienazy eimâ tyh aw?
3. Billy Graham hawhta thâtihpha chho mopathâhpa he atano Marasawzy liata eima y nata y lei chhâna he reih pahmaoh teh u?

Thlarâh
(September)

2

Achuna (2)

KHAZOHPA LIATA THLALÔHPA TA CHAREI SUH VY

“Nâmo keima liata y thlâhâpa ta, ei bie nâmo liata a y thlâhâ hra khihta cha, nama kohpa maih hiah teh u, nama châta taopa ta a y aw”. Zawhana 15:7

Khizaw he âkina, eima kohpa maih a y theipa râh châ hra vei. Krista liata y awpa nata ano keimo liata a y khihta cha thlahlôhpa ta eima y thei aw. He kyh he Khazohpa tao awpa nata keimo tao awpa a y. Keimo tao awpa palôhrupa pachâna he Khazohpa kohpa lâta pathlai awpa a châ. He kyh he thlahpa râh lâ liata hmo yzie a châ viapa vâta thlahpa râh liata chavah mia no tahpa ta theithai viana ta ei vaw reih aw.

Thlahpa râh lâta ei tah nota, hmôthai leina liata ei tah khoh. Chavah mia nopazy liata mia kha cha vâhneina chavah châ ta, ahropa cha vâchhiena chavah a châ. He chavahzy he amo khohna lâ maih a lohpa châ leipa eita, chyhsa a pathipalôh pachâna liata hmo a ypazy châta he chavah he sy ei ta, cha chyhsa lâta ama lopa a châ.

A yzie cha, vâhneina chavah nâ lâta palosa thei chi ta, vâchhiena chavâh chhao, nâ lâta na palosa thei hra. Chavâta Biesoh ta, na pathipalôh pachâna khâchâ vaih ha mah y. Hrona vaw puana châ tlôh ta a tah. A rei kohpa

cha, nâ ta na pathipalôh pachâna vaihpa ta, vâhneina chavah a sya saita na pachâ khiah, hrona vaw pua awta, vaih leipa ta vâchhiena chavah a sya “ei thi aw” tahpazy na pachâ khiah thina a vaw pua aw ei tah khoh.

Vâhneina chavah ta a pangai khoHPa chyhsazy cha, ama pachâna liata

1. Zisu Krista ama chheina hmahzy ta patlâhpa ei châ haw. (Is. 53:5)
2. Tha nâ patlôtuHPa vâta ato ei tao thei. (Phil. 4: 13)
3. Chiehlei chaipa chhao a ngiachhiena vâta thatlôpa ei châ tah mawh sy. (II Kaw. 12:10)
4. Atahmâ he Khazohpa saw ei châ'na. (1 Zhn. 3:1)
5. Eima hrona châta a chhuahna phapa, E.g Khazohpa hmâpa a hneirôhpa (Hak. 1:8)
6. Maniah châta su hneipa, kyhpachâna, hmophapa tao theipazy (Eph. 2:10)
7. Positive (*hmophapa lata pachâna*) Emotionzy ama pachâ hluh. (Rm. 12:17)

Vâchhiena chavâh ta a pangai khoHPa chyhsazy ta

1. China thlahzona , nôpo pachârôhna zy
2. Tao thei aw v'na, tah thai aw v'na, thai thai aw v'na, tahpa sasyh a zo/ngâ leina.
3. Keimo nawh ama thi thai, keimo cha vâchhie thaipa eima châ, keimo tao ana, keimo cha cha hawhpa pi cha a puh mapi, keimo chhôh cha eima hara thai tahpa ta, ziehpa hnei hluhna nata ngiapâna chhiepa hnei ta pachânazy,

2020 Apahrana Chhihthana Bu

4. No zâ thai tuna, maniah hmia chhuh leina, a zakhei tu nazy
5. Hiatlia i-yna, ahaona zy,
6. Apheina nata hmopha leipa tozy
7. Hmo chhiena lata pachâna (Negative Emotion) zy ama pachâ hluh

Pachâ awpa

1. Chyhsapa hro liata siezie miah a panano theipa he hmôna, theina tawhta ma athabya a y? Eima pachâna liata ma a thabya a y?
2. A taih-ohna ma aphahnai via, palôhrupa vai theina he ma?
3. Hmopha tao tahpa chhopasia teh u?

Ihlarâh
(September)

3

Achuna (3)

ZISU CHA KHAZOHPA PHAPA A CHÂ

"A mylâ ta Zawhana ta Zisu, ano lâta a vypa hmô ta, ano ta, moh teh u, Khazohpa Mietakupataw khizaw molei a siekheituh awpa hu " Zawhana 1: 29

Zisu Krista Khazohpa phana zie he theithai via n'awpa ta, ahripa chhiena zie tawhta eima reih tua aw. Sâta cha ano liata chhiena zydua keimo maniah pie koh ta, keimo liata phana zydua ano châta ano ta â la koh. Zisu deikuah cha keimo liata chhiena zydua ano ta a la khai ta, ano liata phana zydua a siana pathaihnyazy a ryutozy, a saw chânazy, Abei lakhozy, theihthaipa chânazy, Khazohpa châna tlai maniah a pie. He vâta Zawhana ta eima Beipa Zisu Krista cha khizaw moleina zydua a siekheituhpa tahpa ta a vaw pahnopa a châ. Khizaw chhiena zydua a la khai ta a phana miah a pietuhpa Khazohpa mietakutaw tagna a châ.

Ngiapâtuhpazy Khazohpa cha a pha tahpa ama pahno. Khazohpa aphazie viasazy chhopachhuahpa rai laipâpi eima hnei. Khazohpa kyhpachâna, Khazohpa phana chhopachhuah laiha he eima hrona chhâpa raihria a châ. Khazohpa phana a laichadaipa chhao a pha.

1. Khazohpa cha a châna liata tlai a pha. ABeipa Zisu ta, “Paw Khazohpa leipa ta pakha hmâh a phapa y v’ei” tahpa ta, Khazohpa deita a pha tahpa ta miah a chho. Khazohpa liata apha leipa y vei. Khazohpa cha a pha. Khazohpa nata a phana pachhaitaipa châ vei. “Khazohpa cha apha apha”, eima tah nota, papypahlyna châ vei. Khazohpa châna dopa a châ.
2. Khazohpa cha kyhpachâna a châpa vâta a pha, kyhpachâna he chyhsa to, hmotaopazy chhao ama khoh. Kyhpachâna yna liata ngiaryh a chhih. Paw kyhpachâna pakhona bie tawhta, Khazohpa ta khatlupa moleipa, kheihawhpa moleina ahneipa chhao sawkhkâ ryureina liata thie awpa ta ama pathlu hawpa moleipazy chhao Khazohpa ama vaw ngai khiah ama kyh a pachâ theipa, khizaw liata ahyhmâh ama khoh leipa moleipazy, dyutlai leipazy, chyhsa hropazy nata pananona hnei leipa ta amo châta su ahneipa Khazohpa phapa a châ.
3. Khazohpa cha zawngiana ahneipa a châpa vâta a pha. Chyhsapa cha moleipa châ pita, Khazohpa ta moleipazy maniah a ngiathaina he eima paphasa. Hlazy 118 a rotuhpa chhao heta, “Khazohpa cha apha; a zawngiana cha chhâzaw ta a ypa vâta,” tahpa ta hla a tao. Biehraï châbu a rotuhpazy hluhpi hryta, chyhsa hluh via ta, Davi nata Pawla châbuzy ama khoh tahpa a châ. Achhâpa cha abei Davi he molei ngaitapa a pheipa, liany a cheihpa a châ. Pawla chhao ano tlaita, “Moleipazy hryta molei chaipa ei châ,” a tahpa

hawhta Awnanopa taola apataosatuhpa a châ. Âmo liata Khazohpa zawngiana cha thata ama paphasa.

4. Khazohpa cha ngiachhiena achâpa vâta a pha. Khazohpa cha chyhsazy hryta hnôkhawpazy chhâh a châpa ta a sie theileipazy, a pi laiha Khazohpa phapa a châ. Khizaw chyhsa zydua he mietakupa zaw ta pakhopa ta, a sietheileipa bâhsypazy, avopazy, ataw sai ma-iehpazy cha apipazy, apypazy chhaota dusawta a chhitha laiha, Mietaku vaihtu phapa ta a pakho. Cha tawhta Zuzy ta pahanoh ta mochaopazy, kusy pheisypazy a patlâhpa cha Zu chyhsa châna tawhta papuapa a châ tahpa ryhpa chichhihpa ama hneipa a pahno thlâhpa ta, apasapa kusy pheisypazy, mochao nahpâpazy â hmô nota patlâh leipa ta y thei leipa Khazohpa phapa a châ.

Pachâ awpa:

1. “Khazohpa apha tlai’na”, tahpa nâmo sasyh ta namâ pahnona rei chyu awpa.



Achuna (4)

**REIPACHHIENA CHA KHAZOHPA
PAHNO KHEINA NGIANA A CHÂ**

Bâtituhpa Zawhana daihti tawhta â tahmâ taihta Vârâ khinarâh cha, tha ta adyupa ta y ta, a dyutuhpazy chata tararuahna ta ama tei tyh. Zawhana 11:12

Zisu Krista Moh ta na hmopha taopazy Khazohpa o a tlô tahpa ngiana cha reipachhiena he a châ. Hlâno Mopathaihpa, Hrosohpazy chhao ama reipachhie hra. Chatawhcha vârâh liata lymâ hluhpi na hneipa ngiana chhao a châ. Chavâta, ABeipa Moh ta hmo na taopa toti liata reipachhiena, taolana, pasipasawna zy nâ tyh khiah la aly kaw muh vy, Khazohpa bie ta miah a tah.

Ngiapâ panaopazy châta reipachhiena taola-pasipasawna zy cha tao theipa châ vei tah ei ta, thlai a dyuh ei ta, ama reipachhie hri tyh. Anodeikua, chôpho chyhsa a keichheih hawpa ngiapâthupazy deikua palyupalihna, reithainazy hlâta reipachhiena âmâ ly via. Reipachhiena cha Khazohpa ta hmo eima taopa “Apha” tahpa ta maniah a pahno kheina achâ tahpa a pahno kheituhpazy châta aly/thapha lei theipa châ vei.

Chyhsa to he eima khôtho chyhsa nata chhoh lâ chyhsa tahpa ta pachhahpa a châ. Khôtho chyhsa

liamarihpa cha “sasyh” châ ta, a khohpa cha ano sasyh liata a lyna, sasyh phana dei a khoh. Sasyh reisai ta y a khoh. Thadâh a khoh, palyupalih a khoh. Sasyh phasana a vaw paraopa maih khoh vei. Reipachhiena tao a ru eima tah tyhpa he eima khôtho chyhsa a vaw parao/ hmâ a vaw paphaopa vâta a châ. Zisu Krista hnohta eima thi hawpa eimâ pahno vei khiah la eima pasâhsa kaw aw.

Chhôn lâ chyhsa cha eima thlahpa a châ. ABeipa Zisu eima py hlâ lei, chyhsa thlahpa cha a thiruapa deita a châ. Zisu Krista cha eima Beipa nata Pachhatuhpa ta eimâ pyna noh liata Thlahpa Pathaihpa cha eima thlahpa liata a vaw pahrâ. Chatawhcha keimo chhôn liata a pahrâpa Thlahpa Pathaihpa nata keimo thlahpa cha a pachhaih thai khao leina taihta â pazaopakhi.

Khazohpa bie miah chhopa hawhta, khôtho chyhsa khohpa nata chhôn lâ chyhsa khohna cha â chakhiah (Rm. 8:7). Tlokhuh âmâ chakhiahpa vâta khôtho chyhsa khohna eima palaisa khiah chhôn lâ chyhsa cha â piepâ thei vei. Khôtho chyhsa cha Krista hnohta a thi hawpa châ ta, khôtho chyhsa khohpa sasyh a palysana hro cha a thi hawpa ta araopa ta, chhôn lâ chyhsa Thlahpa khohna eima papeisa khiah, khizaw chyhsa ta ama khoh lei chaipa reipachhienazy, rietheinazy, maniah kyhpachânazy Thlahpa khohna cha ngiapâtuhpazy ta ama tly via haw. Ngiapâtuhpazy moh biepa miahkha cha “ khizaw a paliepalâpa”, tahpa a châ.

Pachâ awpa:

1. Reipachhienazy liata aly thaina hro hneina he khizaw moleina thailei pachâsana ta nâ pyh thei ma?
2. Zisu Krista ama khaipâ, ama pasipasawhna daihti liata thaichâna bie rei leipa ta â chalih thlâhpa kha khizaw apahniena tahpa ta nâ pyh thei ma?
3. Reipachhie-taolana daihti liata mao-oh thlâna he Khazohpa thlapa pathaihpa châta su eimâ patlyna a châ ma?

Thlarâh
(September)

5

Achuna (5)

THLAHCHHÂNA

"Hiah teh u, chatahna chata a cha pie aw ei. tlua teh u chatana chata nama hmô aw. Chakhy teh u, chatahna chata a cha pahypa aw ei "Mathai 7:7

Ngiapâtuhpazy hro liata Khazohpa Bie nata Thlahchhâna he y vei mawhsala a châ thai lei awpa hmo peimawh ngaitapazy a châ. Khazohpa Bie cha Khazohpa ta bie maniah a chhopa châ ta, Thlahchhâna cha chyhsa ta Khazohpa lâta bie eima chhona a châ. Eima sapa kô 70 chôlâ chhochhi, Thlahchhâ chyh-eina y vei tlai sala, buakha ta eima maophyuh cheingei aw. Eima memory chhietu hawhta eima hmâ haipa Atu, Tâkô dâhdei eima sona pahno tyh khaoleipa pita, thlahchhâna ta eima hmô pathi chatlie tyh.

Thlachhâna cha Khazohpa atotaotheipa nata eima zaona châ ta pheisaihy liata ama supipa nata ama chhohiana bie chhona hawhpa a châ. Chavâta Sâtâ ta a patypamâ khoh kaw. Sâtâ y vei a tahpa na châ khiah thlahchhâna a cha patypamâna liata Sâtâ raihriana hmô thei aw.

1. Thlahchhâna daihti: Thlachhâna daihti liata thlah na chhâ theilei n'awpa ta, thlahchhâna daihti liata

khichhai ta ma ochhi ama vaw chakhyh aw. Telephone ama cha vaw aw cheingei aw. Peimawhpazy a vaw y aw. Cha vaw awsaopazy ama y aw. Na sahrohzy a vaw hmâh aw. Cha vaw chareipazy ta ama o lâta a dipa pachâ leipa ta thlahchhâna nama hmâ thei lein'pa ta, ama cha patypamâ aw. He zydua pahno chhielipa ta, Thlachhâna daihti patu theipa khâchâ na chhuah aw. He zydua he reipasaotuhpa tawhta a châ nota, khatlu peimawhpa chhao thlahchhâna hlâta peimawh vei tahpa nâ vao hâ aw.

2. Thlah na chhâ ngalâ chhoh, mokunazy, Thlahchhâna maniah a paviasapa nomaoh chhôzohnazy, ngia maniah a paryhsa leipa maniah a pazâpazy, pakhuna, pahânazy a y thai kaw. Thlachhâna cha Khazohpa hnohta bie eima chhona a châpa pahnopa ta Thlachhâna eima papeisa aw. Kheihawhpa daihti liata tlymâ, Thlachhâna pachhâ thaileipa ta eima môsaina daihti a y tyh. He hawhpa daihti liata nâ chhuahpa direct ta reih la, Thlachhâna pachhâ para teh. Thlah ei chhâ haw tahpa ta alôh teh. Thlahchhâna pachhâ leipa ta nâ môsai nota, a lôhna hnei thei aw va chi.
3. Thlahchhâna cha, bie siapa, bie phapa reithai leipa ta, tlâ reichakhypa, achhyh aryhpa maih reipa ta thlachhâna pasipa no-ai chhihpa lâta Sâtâ ta miah a chhi tyh. Thlachhâna cha eima pathipalôh liahsa, achhuahpa liahsa eima pachâ chiehpa achâpa a byu. Khâpa ma, Thlah ei chhâ tahpa keimo chhao eima pahno khao tyh leipa he a pei kaw.

Pachâ awpa:

1. Zisu Krista cha Khazohpa lâta miah a reikheituhpa a châ tahpa he keimo zydua châta thlah miah a chhâpa lymâ tahpa ta chhopsia maw ei sila, nâ pyh thei aw ma?
2. 2 Kawrini 1: 11 liata thlahchhâna he vaihzy châta hmophapa eima tao khei thei chaipa achâ'na tahpa nâ pyh thei ma?
3. Thlahchhâ leipa ta hro he nâma pôhkha châta kheita na hmôna dâh a châ?



Achuna (6)

EIMA HMIA LIATA ARÂPASUANA AWPA

Zisu eimâ ngiapâna a taotuhpa nata pakituhpa lâ cha mopa ta eima hmiakô liata arâpasuana awpa a ypa liana he ta tiama ngaitapa ta arâ lymâ ei suh u. Ano chata hmiakô liata thaphana a ypa vâna chata maophyuhna cha papeisa leipa ta, Kraws liata pasa tao ta, Khazohpa ABei dyuchhai chachâh lâna khita a kaw tyu haw ta. Hebrai 12:2

Khazohpa bie ta, eima hmia liata a râpasuana awpa a tahpa he eima hrona châta achhuahna pasipazy nata achhuana pachhohpa zydua a pahly. Marapa he a chhuahna pachhohpa kôkha lyu taona châ khai aw pita, eima hrona châta hrophapa achhuahnazy cha hneileipa eima hluh kaw aw. Chavâta, Marapa Chin State liata ama sipasa chai miah ama tah ngalâpa a châ aw.

Atahmâ tawh, Marapa chhao hneirôhpa, molaipa a châpa, achhuahna laipazy hneipa a pha. Eima hrona châta achhuahna laipa chhao mâ eima sapazy hlao eima tloh nawpa ta, achhuana chyh viapazy chhao eima hnei â byuh. Chahawhta, atahmâ tlai ta hria awpa, tao awpa eima hmia liata rai eima hneipa cha, eima hmia liata arâpasuana a châ. Cha cha, eima taohria awpa a châ nota,

1. ABeipa Zisu Krista khâchâ mopa: Eikha, ABeipa Zisu ti chôta a vaw sie lai, Apostol Pity ta, "kei chhao ti chôta ei vaw siepa na pasaih la" tahpa ta, ABeipa mopa ta ti chôta a sie. Zisu a mopâ ta, a hro lâ mohmia a pasaih nota, tily laipazy hmô ta, chi ta, aku a patu tahpa Biehrai liata eima hmô. A hro lâ mo leipa ta, ABeipa Zisu eima ngiapâna a taotuhpa nata pakituhpa dei mopa ta raihria hmotaopa Khazohpa bie ta miah a chho.
2. Tiamapa : Zawrâpazy ama hnabeidyapa ta, hnôhlâ ama kua hôlô nota hnôhlâ ahei leipa ta hmialâ atôh hualuapa, khopasana a pakaopa tiamana, pahua leipa tiamana cha hlaotlohna â hnia kaw. Hlaotlohna laipazy ama tlô hlâta liata hnohlâ kua hawpa vâta pahleinazy a y thai kaw. Achhuahna siapa, khopasana athupa â pakao vei khiah, tiamana cha atha achhâ khoh tyh. Paha leipa tiamana ta zôpha kawpa ta hmialâ atôh lymâpa, mo hluhpi ama tha chhie ta, hnôhlâ ama kua khai nota, tiamana khâchâ pa-i ta, hmialâ atôh lymâpa cha pahniena laipi ama to tyh.
3. Thaphana a ypa vâta rietheina papeisa leipa : Hebrai châbu a rotuhpa ta a hmôna cha, ABeipa Zisu Kraws chôta, riethei maophyuna papeisa leipa ta a thi ngâhna he ahmia liata thaphana a ypa a hmôpa vâta a châ a tah. Khazohpa ngiachhiena vâta na hrona châta nâ chhuahpa na tlô tita aphazie pahnopasiana chôta, rietheina papeisa leipa ta tiamana ahneipa chata vâhneina eima châta a tao thei tahpa na pyh ma?

Pachâ awpa:

1. Tovyuh palôhtlâ tahpa he achhuahna hawhta hmo a hlao tloh thei leipazy hnohta hnapangâhna bie ma, a châvei khiah, achhuahna hnei lei ta ârypaohna hawta châla'vâ tahpazy hnapangâna bie ma?
2. Finland râh tawhta eima Awnanopa miah vaw tly ei ta, ama reipa cha keimo Finland râh chyhsa cha âchhuahna hnei lei ta Saku a kiahpa y tlâ lei khâh pi ta, khizaw liata ahneirôhpa râh, athaisohpa râh eima châ haw'na tahpa ta ama reih. Mara saw eima dyhchhiena he achhuahna hnei leipa vâta ma, achâvei khiah, achhuahna hnei taraw pi ta Zisu hmia eima pasa leipa vâta ma?

Ihlarâh
(September)

7

Achuna (7)

ZISU EIMA NGIAPÂNA TAOTUHPA NATA PAKITUHPA

Zisu ta Kresawhti thaopa cha a do khai nata, a tloh haw tah ta, chatawh cha a luh a kô ta, a thlahpa pathlie ha ta. Zawhana 19: 30

Biehrai parohpa liata, ryhpazy cha Khazohpa ta Mawsi hmâpa ta maniah pie ta, ryhpazy cha zyh ula nama hroh aw tahpa a châ. Ryhpa cha pha ta, chyhsa zy hmâhta ama zyh theileipa vâta, Izarel mozy cha râpathohpa liata ama thi khai haw. Chavâta, Khazohpa ta Biehraina thiehpâ miah a taopa heih. Cha cha, A sawchapaw matlupa Zisu Krista thisaih ta Biehraina a châ.

A yzie cha, chyhsa ta a zyh paki theileipa ryhpa zydua cha, Zisu Krista vâta a zyh paki hawpa ta Khazohpa ta a palôh atlâh theina, khizaw chyhsa moleipazy châta Zisu Krista pachhana kipa a tao, a pangoh hawpa Biehraina thiehpâ achâ. Kraws chôta Zisu Krista ta, atloh haw/angoh haw tahpa ta thata a aw (Zhn. 19:30) Alyupa Thâtihpha châbu zy liata, "Zisu ao paroh ngaitapata aw h ta" (Mt. 27:50, Mk. 15: 37, Lk. 23:46) a tahpa he Aramic reih ta, *Telelestai* tahpa ta thata a aw tahpa a châ. A yzi cha, ei pahnie haw, ei paki haw tahna a tloh haw tahpa nata miakhapa a châ.

Zisu Krista ta, eimâ ngiapâ awpa, moleipazy pachhana pha pakipa cha miah a taopa haw. Ano ama chheina hmahzy ta Pachhapa ta eima y. Aku aphei, akâ nata aluh liata thisaih a lohpany cha moleipazy moleinazy pasina châta adaih ta, aluh liata hloh lakho ama pakhopa cha keimo abei lakho a kho theina a vaw châ. Ano ama pasipasawhna cha keimo Khazohpa saw châ theina châ ta, a hmia ama pachhaona cha keimo eima hmia kaina a vaw châ. Chhiesana tho Kraws liata ama khaipâna cha keimo byhnâ tona vaw châ ta, ama khaipâna cha hriena awpa tawhta keimo pua theina a vaw châ. Zisu Krista thailei ama pathluna cha keimo thai châna châ ta, Zeruslem khih tawh papua ei ta, Kalvari tlâh *kolkotha* Lurusu tlâh liata ama thiena cha keimo vâ Zeruslem thiehpa angia theina visa hmôna a vaw châ. Haleluiah Amen. Zisu Krista ta, eima ngiapâ awpa, moleipazy pachhana phapakipa miah ataopa hawhta, cha moleipa ahyrai he Thâtihipha thei ta a zopa maih, Thlahpa pathaihpâ ta, eimâ ngiapâna Khazohpa bie cha hmeiseihpa ta keimo liata pachâsa ta, keimo tahta pahnopasiana eima hnei.

Chatawchcha, Zunawh ta Sabath noh ta tlâhleipa, thikhei palâh awpa a châ leipazy patlâh pasai vei ei. Sabath noh ta tlâhleipa a patlâhpa cha Zu chyhsa châna tawhta papuapa a châ tahpa ryhpa a-i kawpa ama hnei. Khazohpa chyhsa lâta a vaw liepa Zisu Krista deikua tlâhleipa ahmô nahta ngiachhie tu ei ta, patlâh leipa ta y thei tyh khao v'ei. Hnôh chhyhpazy, bao ngiahpazy ahmô nata bao lei, deichhy leipa ta y thei tyh khao v'ei. Hnôh

chhupa, bao ngiapazy a hmô nahta baolei, deichhy leipa ta y thei vei. He Khazohpa phana heta eima tha maniah a papawh kaw.

Pachâ awpa:

1. Lâthlôh miah a taotuhpa tahpa nata ngiapâna miah ataotuhpa tahpa âlyu leina zie reih pahmao awpa.
2. "A tloh haw" tahpa bie he tao hria awpa y khao vei tahpa ta chhopasiana ma, namâ pyna a châ via, ngiapâ hnabeiseihna tahpa ta chhopasiana ma namâ pyna a châ via rei pahmaoh teh u.



Achuna (8)

KHAZOHPA BIE DEITA

Ano deikua chata " Chyhsapa he viahchhâ deita ta hroh aw v'ei, Khazohpa pakah ta bie to a puapa deita ta tlaao ama hroh aw" tahpa ta ropa a châ (Mt. 4:4)

He he, 2019 Mara Biehai noh biepipa châ ta, novâh ei tah aw tlymâ, ei vaw thei thai ei tah aw tlymâ, ei vaw thoh kheh kawpa cha, khâpa vâta, hrona a châ hmeiseih leipa tlai, he tlupo hriapasa pita, hrona hmeiseihpa Khazohpa Bie rei n'awpa ta daihti buakha chhao eimâ pie thei vei tahpa he a châ.

Eima Luhki tawh pheipazâh taih, a likawh zydua eima pôhpa he dolei lâta a kua heih awpa sai châ ta, cha liata chhâzaw hmo achâpa Khazohpa Bie khazi ma na hnei tahpa he pachâ cheingeih tlâh a châ kaw. Khazohpa Bie, cha Khazohpa cha, Thlahpa hmo, chhâzaw hmo hmeiseihpa, Thlahpa zaozie keimo chhoh liata a ypa châ ta, Sâtâ ta a chi. ABeipa Zisu tlai chhao Khazohpa Bie ta Sâtâ a pahnie. Nohkha dawh 24 liata dawh khopheh chhâ Khazohpa Bie rei Thlahchhâna ta Khazohpa akaona ta hmâ thei awpa a pha kaw.

Eima sawnawh he ama hawti nota Khazohpa Bie hluhpi pavaosa thei eimâ chhuah aw. Ama pahno thaina

daihti liata ama bievaopa pha kawpazy ama vaw zo tita, Thlahpa pathaiha ta ama hrona liata ahmeiseiha ta a pachâsa aw. Ama Khazohpa bievaopa zydua cha amo ta ta, ama zona daihti liata ama châta bie hrohpa lâta â vaw lie khai aw. Amo châta hmo a taopa bie ta a vaw châ khai aw.

Âtanoh, ngiapâtuha hluhi cha Khazohpa bievaopa ama hneieipa vâta ama chhôn liata Thlahpa pathaiha raihria thei vei. Thlahpa pathaiha cha Thlahpa hmo a châpa Khazohpa Bie deita hmâh ta rai a hria thai. Ngiapâna cha Khazohpa bie zona châ ta, eima zopa Khazohpa bie cha Thlahpa Pathaiha ta keimo hro liata a hmeiseiha ta a vaw pachâsa nota, keimota ta pahnopasiana eima hneipa a châ. Khazohpa Bie eima chakâh khiah la eima ngiapâna chhao eima chakâh tagna a châ.

Khazohpa Bie cha Khazohpa china châ ta, Khazohpa Bie ahneituhpazy ta hmoparao thei v'ei. Thyutliazy ta kheihtha hmoparao leipa ta ama y thei aw? Khazohpa Bie ama hnei hluh khiah Khazohpa ama china ta a hrôbih aw ta, thlyutliapa ta hmoparao leipa ta a y thei aw. Khazohpa Bie ta miah a chho lilaw (Hla. 19:7)

Pachâ awpa:

1. Khazohpa Bie eima hneirôh thei awpa châta chhôhkha ta Biehrai miakha chyu hneina tawhta mo pakha ta Biehrai miahkha chyu hnei thei awpa ta chhôh to ta a chhuahna hnei awpa na paphasa ma?
2. Sunday School liata bievaopa rei lymâ tarawpa ta eima my chhyh hawpa he khâpa vâta a châ tahpa na pangiasa?

Ihlarâh
(September)

9

Achuna (9)

PATHAIHNA

Nâmo nama pathaih awpa a châ. Kei pathaih tlôh nahta tahpa ropa a châpa kha. I Pity. 1:16

Pathaihna he chyhsa to ta eima khoh. Khazohpa chhao akhoh pachai hra. Eima pôhpa pathaih hlei khô ta, eima hrona chheipâh zydua a pathaih awpa a châ tahpa ta Khazohpa Bie ta maniah a chho. Achhâpa cha, Khazohpa cha pathaihpa a châpa vâta.

- (1) Chanô-chapaw châna eima pabohsa aw. Nothlahpa phaleipazy moh aw mapi. Nothlahpa pha leipazy he ahripa châta su piena châ ta, sasyh liany cheina a tlôkhei. Sahma parina nata paritheipa hmâna he ta apheina nata liany cheina a tlôkhei. Myuthieh kumatuna hlâta, chanô-chapaw apahnona Sex hmâna cha Khazohpa khoh leipa châ ta, vâduana a tlôkhei thai kaw.., ama tah tyh.
- (2) Tâkâ/ Phusa hmâna/ hmôna liata eima pathaih aw. Khizaw chyhsa hluhpi ta ama pao thai chaina cha, chanô-chapaw kyh, phusa nata hneirôhna, bieheina (ânâh/power) liata a châ ama tah. Marapa chhochhi cha, dyhchhie, sipasa nata yzie eima thai vei., rai laipa hriana nata hneirôhna cha pahnaikhei thei

mapi ama tahpâ ngâlâ. Chavâta, Khazohpa ta maniah a chalo khiah, zawrâzy hlâta eimâ panawhsa viapa â byuh/haw aw. Phusa liata eima pathaih cheingeh âbyuh/haw. Khazohpa maniah a pie leipa Tâkâ/Phusa a la leipa ei silâ, eima tovyuhzy Khazohpa ta hmâ a khohna liata hmâ thei eimâ chadai hri aw.

- (3) Bie rei-kathlâ, atyu-aduana liata eima pathaih aw. Khazohpa ta a Thlahpa Pathaihpa miah a piepa cha, eima reikah, eima hro atyu-aduana liata âlâ awpa a châ. Chavâta, Biehrai ta eima reikah a chado awpa, atyu-aduana a chado awpa hluhpi miah a pachu. Zami Bo.3-na liata paleih kyh thata miah a pachu. Pathipalôh liata biepakhôpa hawpa he pakah ta a reih papua tahpa a châ. ABeipa Zisu tlaita, pakah lâta angiapa hlâta pakah tawhta apuapa bie he a chado viapa achâna zie, pakah tawhta apuapa bie he ta chyhsa a parao thei atah.
- (4) Eima pathipalôh ta eima pachâpa he a pathaih awpa â byuh. Chinazy, thlazohnazy, vâchhie thaipa, chiehlei thaipa, dyutlaileipa chi, chhâ pachhohpa pho tahpazy pachâna liata riahmo pie awpa châ vei. Krista ngiachhiena vâta eima tao thei aw tahpa ngiapânazy, hnabeiseihnazy, thapawhnazy, chhôn mâ sana (Vision) zy , raihria tiamanazy eima pachâ hluh aw. Na pachâpa chata na hrona a vaw châ aw.

Pachâ awpa:

1. Athaona Bo.30 chhoh liata Zawsî kha Pawtipha lapinô apheikhei mawh sala, duahmo sâhpa atlô thei nahta nama pangiasa ma reipahmaoh teh u.
2. Pathaihna liata pôhpa pathaihna chhao a peimawhna reih hra teh.

Ihlarâh
(September)

10

Achuna (10)

**NGIAPÂNA PACHYUPA nata KHOPASANA
EIMA PEIMAWH**

*Siana khoh ta, nodi dâhphipazy ama nohhlaon na,
ama ao a vei awpa vâta. Mathai 5:6*

Lebanon râh chhituhpa, UNO Chairman a vaw châ hawpa Dr. Carlic Malic ta, pahniena cha Khazohpa tluana, Khazohpa pahnona Khazohpa kyhpachâna nata Khazohpa reingiahna liata a châ atahpa hawhta, Khazohpa pahnolepazy cha buakha a vaw sâh kaw hra ei sala, ama tla hâ tyh. Aduah parei thei v'ei.

America Foot ball pachutuhpa hlaotloh chaipa, Cowboy pachutuh chaipa, alei chô adyuhna einona liata Germany Hitler chariah, Italy Monso Lenin chariah zy B.17 zawtheina ta a vaw dyuh hawpa, Billy Graham Thâtihipha chhona Py liata Chairman ta avaw chakao lymâpa Tom Laundry he âthaotua nota Thâtihipha he sawthi ta reih vei. Anodeikua, ahrona liata khâpa tlymâ phahlapa ta â pahno. Nohkha cha, a viasapa ta, Thâtihipha ama chhopa nahthlie awpa ta ahrua. A viasa nôuriah chi ta, thâtihipha cha a nahthlie. He daihti liata ahrona ta â phahlapa cha, Khazohpa nata akao awpa a vaw pahno. He noh tawhta ahrona cha pahniena,

hlaotlohna zy tha ta a to. Khazohpa Biezy hry ta, Pawla ta arâpasuana kyh areipazy a khoh pachai.

Chatawh cha, Tom Landry ta, football, raihriana, achuna, Thâtihpha chhona nata kyh toti liata pahnie n'awpa ryhpazy a thaoh papua.

1. Ei pahnie aw tahpa ngiapâna hneipa, ei nuapa achâ cheingeh aw, tahpa ta alôhna a châ. Hmô mâh vei hra sala, na hnabeiseihpa hmo châta eina hâ thlâh haw tahpa alôhpa ta ngiapâna hnei awpa apeimawh.
2. Anuapa tlô thei n'awpa ta hria papuana (he liata discipline chhao âhlao), Anuapa tlô thei n'awpa ta ahriena/achuna hnei awpa apeimawh.
3. Anuapa kaotôh (châtaw) siapa (definite goal) apeimawh.
4. Achhuahpa /anuapa tlô theipa ta khopasana, amô-azia kheh thei leipa khopasana/ nodi-dâhphi tlu ta khopasana.
5. Pahâ leipa tiamana, maniahzy hnôhsypa ta hnôh lâ ama kuana hry ta, pahâ leipa ta hmialâ atôh hualuapa maih cha pahniena rônahpa ama hmô. Hnôh lâ akuapa maih, pahniena poh zaw thei beih veih ei, tahpa pahniena ryhpa miah athao papuapa.

Pachâ awpa:

1. Na hlaotloh leina he ahy vâta a châ aw.
2. Ngiapâna leipa khopasana he achhâna lâ liata kheih hawhpa duasu liata miah â chhi papua aw.

Thlarâh
(September)

11

Achuna (11)

ZUAH TA, CHALEI HAW TA

“Varâh khinarâh cha lyu liata ryubyh nyupa, chyhsa pakha ta hmô ta, nyu heih ta, aly tupa vâta sie ta, a hneina zydua zua ta, cha lyu cha a chaleipa hawhpa he a châ.” Mt. 13:44, 45.

ABeipa Zisu tlai ta a reipa Khazohpa Kihnarâh cha ryubyh sôhpa nata taikuh lôsôhpa ta pakhonazy liata, zuah ta châlêi haw ta tahpa eima hmô. Pachhana cha a saipa ta piepa ta, Biehrai ta maniah a chho (Eph 2:8). Ngiapâtuha eima hro liata, khataih su liata zuapa ta chaleina he a y tahpa pachâ a peimawh kaw.

Khazohpa kyhpachâna pahno thei pi ta, a kyh pachâ pi ta, Zisu Krista cha eima Beipa nata Pachhatuha ta eimâ pyna liata Thlahpa Pathaiha cha keimo chhôn liata a pahrâ haw. Eima khôtho chyhsa (sapa) he ta Thlahpa cha a pata. Keimo chhôn liata pahrâpa Thlahpa Pathaiha cha pua ta lo papua theina hnei vei. Thlahpa Pathaiha eima hnei hlâta keimo thlahpa cha athipa châ ta, Thlahpa Pathaiha pahrâ n’awpa ta a su deita pachâ theipa a châ. Keimo chhôn liata Thlahpa Pathaiha cha hmasie n’awpa ta piepa châ taraw (I Kaw 12:7). Eima khôtho chyhsa ta akhupa vâta khâpahmâh raihria thei vei. Eima khôtho chyhsa khohna, apalaina, sasyh angâna, sasyh thaina,

sasyh alyna, sasyh riethei apasai leina zydua zua khaipa ta, Thlahpa Pathaihpa keimo chhôn tawhta a vaw loh papuapa khihnarâh thiehpa cha chalei â byuh.

Thomas A. Edison he nahpâpa châ ta, châ pachu thaipa châ vei tahpa ta, saku tawhta ama papuapa a châ. A bievaopa cha, “Khazohpa y ta, keima y nata, tiamana hro ei hnei khiahta la hmozy ei tao thei,” tahpa a châ. Sasyh alyna, sasyh thadâhna, sasyh riepathei khoh leinazy zuah ta, tiamana a chalei. Chavâta châ athai leipa ta The Great Sincenstist rônah chaipa a vaw châ haw.

Scoff Hamilton he hawti a châ nota thi daimâpa taih pasa ta, alaiseihna zydua a chalih. Thlahpa Pathaihpa ahneipa a ngâpachhâpa ta a thazâh hneileina he pahaona ta a la ta, rietheina papeisa leipa ta sasyh â hrie lymâ. Olympic a taopasuana liata ngôh medal a hmô. Brack Paks he motor car accident vâta palyhna dyuhchhai (Wheel Chair) ta apasiepa a châ. Khazohpa ngiachhiena Thlahpa Pathaihpa vâta kheihawhpa tlyma ei tao thei aw tahpa pachâ ta, Wheel Chair Tennis Association Founder a vaw châ haw. Williamette Rudoff he polizi pasana vâta kô 12 a tlohna taih chôchahrei ta a pasie-pavawhpa a châ. Thlahpa Pathaihpa vâta Olympic Arâpasuana liata ngôh medal ei hmô hlâ lei tahpa ta sasyh a ngiachhiena zuapa ta arâna he sasyh â hrie lymâ ta, kô 8 chhôn a râhrehh tawhta 1960 kô ta Olympic â râpasuana liata ngôh medal miathôn a hmô.

Pachâ awpa:

1. Ngiapâtuha Khazohpa sawzy pi ta khâpa vâta chaolahmei eima châ? Nâma zaw khâpa chhâ tlyma na chhôhkha nata na râh châta na tao thei hra aw.
2. Khâpa vâta eima hro liata sapa khona eima zua thei leipa he baotuhpa eima hâpa vâta ma? Keimo tlai he ma a pasai pi vâ?

Ihlarâh
(September)

12

Achuna (12)

TAOTUHPA KHAZOHPA MIAH TAO CHHÂPA

Chanô ta “Ei hmotaopa maih eina chho lyma” tahpa ta a pahnosapa v’na khata, cha khi liata a ypa Samari chyhsazy hluhpi ta a ngiapâ ei ta. (Zawhana 4: 39)

Zisu ta ama hnohta, “Na tuatuhpa khohta taopa nata a raihria paloh awpa he ei pati a cha” Dawhkâh (table) cha châbu sona, châ roh n’awpa ta taopa châ ta, anodeikua dawhkâh ta ei chô ta châbuzy soh thei v’ei chi, châ roh thei hra v’ei chi tah sala, a taotuhpa palôtlâh aw vei. Dyuchhai cha chyhsazy atyu n’awpa châta taopa châ ta, chyhsazy ama tyu khiah cha a palôh a tlâh kaw aw. Taotuhpa maniah ataona chhâpa liata ei y tahpa â pahno theina he eima rie atheipa chhao eima ly. Eima rietheina he byhnâ eima tona a châ.

Thâtihpha Luka 15:1-10 chhôn liata mitakupa a leipa pakhona eima hmô. Mietaku vaihtuhpa châna chhâpa cha, pabohsa awpa nata pahleipalô lei awpa a châ. He vâta, sychaki nata pô chaki sie saipa ta, a leipa cha ahmô heih hlâ leita a tlua tahpa eima hmô. He liata a raihria chhâna chaipa kha ahriapa vâta a rie thei kaw hra sala a hmô nata â ly ngasa tahpa eima hmô. Mietaku vaihtuhpa cha cha sychaki nata sâ chakizy hlâta a lei hawpa pôkhapa châta â ngiah via haw vâta a sie sai theipa a châ.

Eima Beipa Zisu Krista tlai chhao vârh liata palyupalihpa ta y awpa hlâta khizaw lâta zu awpa â ngiah via hawpa vâta rietheina hluhpi taopa ta khizaw lâta azupa a châ hra. He liata taona chhâpa tahpa cha, Krista vâta angiah viapa liata yna he châ ta, âchhyryh viana liata yna he châ vei.

Rev. K. Teitu, bie eina chhopa liata ei pasô kawpa miakha cha, MIEC, Headquarters Sabyhpi lia châta châbu chhuhna khaw (Press) ei chaleina daihti liata maochhiena tha ta ei to tahpa eina chho. Athai via, asoh viapa, nôpaw via a tahpazy ta, “Kihpi achâpa Matupi hawpazy liata soh ula, tâkâ hluhpi hmô aw ei chita chhaichhi hiabâh patôhpatiana chhao a ryhpaoh via aw tahpa sai ta eina chho ei. Kei ta ei chhupa cha, ‘A ngiah viapa liata y awpa ta Khazohpa ta eina aw tahpa ei pahno’ tahpa he a châ”, tahpa ta ei na chho.

Pachâ awpa:

1. Eima rypaohna hmia pasapa ta angiana raihriapa châ mawh sala, taona chhâpa achhuahna a châ hmeiseih eima tah thei aw ma?
2. Zisu Krista he Vârh tawhta khizaw pachha thei thlah hâ awpa tlai ta, riethei tao awpa ta khizaw lâ a zupa he a pahnai viana rei pahmaoh teh?

Ihlarâh
(September)

13

Achuna (13)

KHAZOHPA BIE CHA HROH TA HMO A TAO

Khazohpa ta khizaw kyhpachâ ngaita ta, a sawchapaw matlupa pie ta, ahyrai a ngiapâpa maih leidia leipa ta tlyzaw hrona ama hnei n'awpa ta, khizaw thailei pachâsa awpa ta Khazohpa ta a sawchapawpa khizaw lâta avaw tuapa châ vei. Khizaw ano vâta pachhapa ta a y thei n'awpa ta a tuapa tiao a châ. Zhn 3:16

He Khazohpa Bie he chyhsa hluhpi nahthlie ei ta, thokha a ly kaw ei ta, Pachha châ amâ pahnopasia. Thokha dei nahthlie ei ta, ama ualua ta ama y. Amâ nanona y vei. Khazohpa Bie cha a hroh tahpa pahno leipa ei ta, khizaw bie nahthliepa hawhta ama nahthliepa vâta a châ.

ABeipa Zisu he Khazohpa chyhsa lâta â vaw liepa châ ta, Zu nawh ta Pahânoh ta atlâh leipa a patlâhpa cha Achhyna o tawhta papua'pa (cha cha Zu chyhsa châna tawh papuapa) tahpa ryhpa â-ipa hnei ei ta, ama râh ryhpa liata a paraopa hawhta ama pachâ. He ryhpa pahno thlâhpa ta ABeipa Zisu cha mochaopa, kusypazy tawhta atlâh leipazy a hmô nahta patlâh leipa ta y thei khao vei. He he, Khazohpa hro ahroh thlâhpa a châ nota, hlâno Kraws liata maniah a thi kâna kha, atanoh chhao

keimo châta nata keimo vyuhpa ta chhiesana Kraws liata maniah a thi kê ngalâpa a châ.

Keimo cha, ama chheina hmahzy ta pachhapa châ pita, (Isai 53:5) a ku a phei, a kê liata thisaih alohpazy cha eima ku moleina, phei ta moleina lâta moleinazy, eima pathipalôh pachâna tawhta athaopa moleinazy pasina nata a ngiathaina châta â daih-paki. Ano luh liata hloh lakho cha keimo lakho eima khona châ ta, chhiesana Kraws athina cha keimo byhnâ tona châ ta, Zeruslem khih tawhta papua ei ta Kalvari Lurusu liata ma khaipâna cha keimo Zerusalem thiehpa liata angia thei n'awpa a vaw châ haw, Haleluiah Amen. He he AD BC athaona rachhôh a chhichâpa history dei châ leipa ta, ahroh thlâhpa, atanoh keimo châta achâ ngalâpa hmo a châ. Ahrohpa a châpa vâta keimo châta Pachhana ta hmo atao thaipa a châ. Ahrohpa achâpa vâta keimo châta Pachhana ta hmo atao thaipa a châ. Eikha cha, police beipa pheiky liata, Mathai 11:28 "Namo hriapasapa nata phaohripa sai u, ei hnohta a vy u la, cha pahâsa vâ eina" tahpa bie ypa châhna â vaw bai. Police beipa cha moh ta, châ reih ta, no-ah a tah kaw. He tlu khizaw riethei chhiepa ta, ahyma, miah a pahasa thei awpa cha! kheh hawhta pahâna ma? tahpa ta, ABeipa Zisu bie achâpa vaw pahno ta , a thâti h a chu ta, pachhana a hmô haw tahpa a châ.

Eima hawtizy he ama bievaopa ta Khazohpa Biezy pavaosapa a pha kaw. Khazohpa Bie hropa cha ama hro liata hmo a tao aw. Khazohpa Bie ta hawtizy pathipalôh pachâna liata chi a rie hluh vei khihta la, râhmâhpa lyu chi chei leipa hawhta a lô-ia, diahsai sibiepa chi pha leipa

to vaw pyuhpa ta, lyubipa chatôh theileipa lâta thlano thlathôh chhâ tlaita â vaw lie bâ aw.

Pachâ awpa:

1. Khazohpa Bie a hroh, hmo a tao tahpa he khatlu ta na pahno? Pachâ pathu via bei teh?
2. Khazohpa Bie nâmo mopakha chyu liata hmo a tao theina reipahmaoh chyu teh u.



Achuna (14)

**THLÂ KHAOH KIAH LIATA CHYHSA ZYDUA
MIAKHA EIMA CHÂ**

“Chyhsa ta nama chôta ama taopa nama khohpa hawhta, chyhsazy chôta tao hra teh u. Mt.7:12.

Dr. Ed Rosenbaun (Dr. Jack Mckee) he Surgery Doctor a saomâ ngaitapa a châ. A viasazy cha hneirôhpa, o pha chaipa liata a tlôhpa, motor car pha chaipazy a hneipa, ano ano â tahpazy ama châ. Dr. Mckee ta kyhpachâ, zawngiah, ngiachhiena tahpa he a pyh thei vei. Chyhsa ngiachhienazy he âbyuh leipa hawhta a hmô. Hneirôhpa a châpa hawhta, chyhsazy ta ano ama ngiachhie n'awpa su hnei leipa ta, ano chhaota chyhsa ngiachhie awpa he pachâ beih hra vei.

Dr. Jack Mckee he tlâh leipazy operation a taopa liata operation room cha dawh hlasapazy pahy ta alôsaoh ngaitapa ta a tao tyh. Dawty kô hluhpi a vaw châ tawhta, tlâh leipa ta a vaw y. Sokha ta pakhu ta, athi hluhpi a pali. Pachâ leipa ta cancer pasana a vaw hnei haw. Cancer pasana a vaw hnei tawhta a viasazy y khao v'ei. Vâsa ta thohna o lâta sanawh ta ama chhitha. Thohna o liata uniform ama vaw pakypa cha dawhty uniform châ khao vei. A pasapazy uniform a vaw châ haw bâ. Doctor Mc Kee ta a uniform â kypa cha moh ta, Surgenry Doctor

moh pathâh kawpa ta dawhty hluhpi ta ama pazi tyhpa tlaita a pasapa uniform a kypa ta a pasapazy hnohta rakhô liata â vaw ziapa cha a ngia â chhie kaw.

A mothlih vaw loh ta, aru lâta â hru paru. Noh hro ta a pasapa Operation taopa ta dawhty thiehpazy nata nurse zy ta ano a vypata nahta a paziahpa ta amâ duapâ tyhpa tlai cha a pasapa duahmo ta a zia ta, hrobiehpa a châ nota, a vaw vaih awpa doctor nata nursezy ahâpa rairu a tah kaw. Chatawha a rairu via heihpa cha, nursezy tlaita ama mo a pasaih ei ta amâ hrâh hnaopa he a châ. Dr. McKee hro liata ngiachhiena, kyhpachâna a peimawh zie a pahno haw.

Apasana cha electric mei ta pakâpa châ ta, eikha pakâpa hmâhta aru a tah kaw. Ei hluhpi pakâpa a châ. Mei ta ama pakâ chhoh a pahâna pahno khao vei. Hneirôhpa châ ta, a pahâsa chaipa niedopa zydua a pahâna pahno khao vei. He daihti liata a pahâsapa cha kyhpachâna, ngiachhiena a hneipazy ta vaw vaih ei ta, bie ama vaw chhopa he a châ. Round achahlôpa dawhty nata nursezy ta kyhpachâna, ngiachhina hneipa ta a tlâhleipa ama vaipa a khohkhei haw.

Dr. McKee cha a vaw tlâh haw. Doctor rai a pazao. Doctor thiehpazy nurse thiehpa a chakaolâhpa zydua cha 'chyhsapa cha pasa thaipa châ pita, a pasapazy he ama thi a pie ula, ngiachhie ula, kyhpachâ ula, mohoh pha bei muh vy. A hrâhnao khuh vei. Kei ei cha khohkheipa ei cha, doctor form pahluhpa ta noh palih chhoh a pasapa rakhô liata a zia ula, pasapa form a ky ula, nama vaw tlâh khiah nama pahno khai aw' a tah tyh ei.

Pachâ awpa :

1. Thina thlâkhaoh kiah liata chyhsa zydua miakha eima châ tahpa kheita na thei thaina zie a châ?
2. A thi chy awpa tahpa eimâ pahnopasiapa he kyhpachâna a papôh tahpa nâ pyh thei ma?

Ihlarâh
(September)

15

Achuna (15)

AVÂ OPY A CHÂ HE ZAW!

*Chatanachata chi ta, "He su he chi a chhik kaw dia!
He he su hropa châ vei hi; Khazohpa o na a châ hi, he he
avâ chhiekao na a châ hih" tah ta. At. 28:17.*

Zakaw ta a uhta Esaw ryuto a chhupa vâta chi ta, a pupa Laba lâta ano deita â râ nota a zoh khâh haw. Râhpathohpa liata ano deita ta, ariepa a châ nota, chinazy thlahzonazy tha ta a hnei aw. Chyhsa chhiepazy ama thiepha chi aw ta, sâhrâpazy a chi hra aw. Cha zydua hlâta achi chaipa cha a uhta Esaw ta a hnie vaw padaipa ta, a thiesao awpa a châ. At. 28:17.

Râpathohpa liata a ziana a paryh ta, alô seiha cha lahuah ta a huahpa ta a mô ta. Khazohpa ta thlah vaw palôh ta "Zakaw chikha, cha hrôbieh aw nahta thlahôhpa ta na o ei cha padisa aw," tahpa ta. Cha nota, Avâ opy a pahypa hmô ta, Vâlyuchâpazy ta chô heih, kiah heih ama tah ngâlâpa chhao a hmô. Zakaw ta, "Vaw pahno leipa nahta he su he Khazohpa o na a châ, Avâ opy na a châ," tah ta, â huapa alô seiha cha bô ta, Bethel su tahpa ta moh a bi. Suhraw sukha pie awpa bie â taih. Eima yna su maih, eima raihriana su maih Khazohpa ypâna a pahno ta, he he Khazohpa o na a châ, avâ opy na achâ, tahpa ta

pahno thei awpa eima peimawh. Khihpi liata eima ypa chhao, khi tatawpa liata eima ypa chhao Bethel Lôbô a bôpa ta, he liata Khazohpa cha a y tlai na! tahpa ta, suhraw sukha piepa ta Khazohpa ryu byh âhly thei awpa a peimawh.

Brother Lawrence cha thlasi (Chasipaw) daihti liata thokôpazy a hna leipa ta âduapa nata nopi (Chahvâ) daihti a vaw chhi nahta a hna thiehpa a vaw pathliepa hawhta , Thlahpa lâta athipa a châna nata pipathi â byuhnazy a pahno ta, kô 18 a châ nata a hro â nano. Peris khihpi Cami Life Awnanopa liata Brother ta a pyh eita, moh thiehpa Brother Lawrence ama bi haw. A molei hmoparaopazy vâta Khazohpa tawhta hriena a mokhâh nota, moh thiehpa Lawrence tahpazy, molei ngiathainazy, alyna nata thlahlôhna, a pachâna apha leipazy Khazohpa tawhta a to nota, Khazohpa phanazy no-âh a tah kaw.

Raihria a topa cha, a khoh lei chaipa Brother zy châta beihchho, pakâh beiphiah pasipa rai a châ. He he pahaona ta a pyh ta, chyhsapa châta hawhta hria leipa ta, Khazohpa rai hawhta kyhpachâna châta apha thei chaipa ta a hria nota, chyhsa phapazy lâpi a taotuhpa lâta â vaw lie haw. Brothern Lawrence he ta Simalâ liata sekâh (second) pyu a paropazy cha Khazohpa ypâna a chhopa ta a pyh ta, sekâh to ta, Khazohpa eina ypâ tahpa a pahno thei nota, beihchho, pakâ, nyu pasipa rai ahriapa cha Khazohpa chakaona rai ahriapa ta a pyh ta, Thlah a chhâ ngâlâ no, apakhyna – o liata a pakhy ngâlâ no hawhta pachâ ta, zawpi ta ama awsaopa pyu zy, “A chatliesa

teh”, tahpa ta achô utheipazy ama rapa pyuzy cha maisâh liata sermon a theipazy, Khazohpa reithaina hla ama sapa pyuzy hawhta pachâ ta, aly kawpa ta, hmiaphao phapa ta kyhpachâna chôta beiphiah a pasi thei.

Brother Lawrence ta a reipa cha, “Khazohpa ta rai laipa, rai nawhpa tahpa liata moh vei. A rai he alaipa chhao anawhpa chhao kyhpachâna chôta ahria/hrialei dei a papeisa,” a tah. Daihti to maihta Khazohpa eina ypâ tlai tahpa kheihtha eimâ pahno thei aw?

Reipahmaoh awpa:

1. Daihti to maih ta Khazohpa eina ypâ tlai tahpa kheitha eimâ pahno thei aw?
2. “Avâ opy pahyna” cha, Khazohpa maniah a ypâ tahpa â pahnopasia ta, kyhpachâna chôta raihriana he a châ tahpa bie he rei pakawh teh.



Achuna (16)

**THEIKU THABY LIATA NA Y NONA KHA
EI CHA HMÔ MÂHTÂ**

Nathaniah chata a hnohta, nâ ta kheita e eina pahno chi, tah ta, Zisu ta a hnohta Phili ta a cha aw hlâta theiku thaby liata na y nona khata ei cha hmô mâhtâ tahpa ta a chhy ta. Zhn. 1:48.

Nata Nathanael zy he Bethsaida khih mo châ ei ta, viasa rihchâhzy ama châ. Phili ta Zisu cha Mesia a châ tahpa a pahno nota, a viasa Nathanael cha Mesia cha ei hmô haw. Nazari Zisu tahpa ta a chho. Nathanael he chyhsa kôpazy heta mohnaohna ama hnei thai. Nathanael chhao, “Nazari khih tawhta Mesiapi a pua thei ma?, thlai atah. Phili deikua bie a ei khoh vei. Khazohpa bie he a eipa chi châ vei, a hro ta ama hrokheipa a châ a tah. Chavâta, Phili ta avy la, vaw moh tua tahpa ta a hrua.

Zisu ta Nathanael hnohta avypa a hmô nota, “Izarel chyhsa haidi haiduana a hnei leipa tahpa ta Nathanael ahnohta avypa a hmô nota, “Theiku kô thaby liata na y no kha ei cha hmô mâhtâ”, a tah nota Nathanael cha Mesia tlai a châ tahpa a pahno haw. Nathanael he theiku kô thaby liata Mesia a vy bâ la tahpata palôh châ chaimâhpa ta thlah achhâ. Cha cha, Nathanael ta my thei

vei. Zisu ta Nathaneal chhôn liata a ypa, “Izarel chyhsa haidihaiduana a hnei leipa tahpa vaw thaoh papua ta, Nathanael ta kheita eina pahno tly, Phili ta a chho tlymâ a tah ngala nota, a pachâna athu viapa liata a ypa, “Theikukô thaby liata ei cha hmôna”, a tah tawhta cha Mesia a châpa vâta eina pahno thei a tah haw.

He he, thlah eima chhâpa, keimo ta eina chyh-ei tlai tahpa eimâ pahno hlâta Khazohpa ta maniah a thei tua, maniah a hmô tuana biehmeiseihpa a châ. Thlahchhâ chyh-eina he Khazohpa a hmeiseih, Khazohpa hmeiseihpa achhupa eima châpa miakha a châ.

Mr. Lim Cheong he Combodia chyhsa, a paw cha Tâkâri ta Khazohpa nothlahpa taona ta a py a chyhpa a châ. Lim Cheong he kô 12 tawh thlahchhâ chyh-eipa Khazohpa a tlua pathao. A paw taopa Khazohpa nothlahpa achhypazy sawsa vei. A paw nawhta he Budha phungkyi châ ta, ano lâta vawh ta, thlahchhâ chyh-eina ama hmô/ hmôlei a hiahri. Phungkyi chata, Thlahchhâ miah achyh-ei tlai tahpa ta rei nailaihpâ y vei a tah. Chatawhcha, Krizyhpâ missionary hnohta, “Thlahchhâ chyh-eina nama hmô mâ? a tah no ta, ano tlai thlahchhâ chyh-eina a hmôpazy hluhpi a vaw chho. He noh tawh Krizyhpâ Khazohpa chakao awpa ta bie a chhawh haw.

Zisu angiapâ awpa ta a paw a chho nota a heihâh kaw ta, “Zisu nata vâ chaku teh”, tahpa ta o tawhta a papua. Lim Cheong ta ei paw ta o tawhta na papua haw ta nâ ta eina mohôh khâsia thei chi ma? O miakha na pachâpa ma y.. tahpa ta thlah a chhâ. Room 3 ahneipa, bathroom 2 ahneipa o a chalei thei.

Lim Cheong he pyhrawh pass ta, Biehai College kiah ta Pastor a châ. 1964 kô Cambodia tawh Missionaryzy ama papua nota, Thâtipha achhopa vâta Lô-o ama patâh. Ama vaw papua. He tawh ama chhônkhâ liata a nô seihnai cha kri a vaw zyh. A uhta nawh pakha tawh pakha hnohta kri vaw zyh lymâ ei ta, achhâ chaina ta a paw chhao Khazohpa â vaw ngiapâ haw.

Pachâ awpa :

1. Thlachhâ chyh-eina he keimo phana vâta châ vei. Khazohpa saw eima châpa vâta a châ tahpa châ ta, Thlachhâ chyh-eina na topazy reih teh.
2. Khazohpa ngiachhiena vâta eima tah tyhpa he, eimâ lyna bie ma, eima pachâ leipa, eima puh leipa, eima topa tagna tlymâ, thlachhâ chyh-eina vâta ma, tahpa reipahmaoh teh u.

Ihlarâh
(September)

17

Achuna (17)

PASAIPHA

Chatawh cha ngiapâna he hmôna hnabeiseihpazy a y tlaipa ta pahnona hmo hmô leipazy pahnopasiana a châ. Cha liana chata machâ sahlaozy kheita rei thaina hlao tlôh ei ta. Heb. 11:1-2.

Hebrai 11 chhôn liata Khazohpa pasaiphazy thâtih eima hmô. Mara reih ta “Pasaipha” tahpa he yzi a hnei kaw. Kih nah râh châta a pasaih pha ei ta, machhyu mahrâhpa châ thei awpa ta a pasaih pha ei ta, pahnetuhpa rônahpazy cha Pasaipha tahpa a châ. Maniah zawrâpa hlâta a pasaih pha, tiama via ei ta sa phao/nga phao, chaolia, masiah hluhpi ama ka. Maniah zawrâpa hlâta tiama via ei ta, kô ama pavei via. Ama sa phao, sâh pamâpazy zawrâpa hlâta a pasaih pha (riahpha) ei ta, kih nata râh nôpona chahruh ei ta, phahla bao ngiahpazy ama panie padosa. Zawrâpa chyhsazy hlâta ama riah a papha ei ta, chariah chakeih chi lei ta, zawpi vatlâhpazy ama pabohsa. Cha cha, pasaih pha/Pasaipha, ama tahpa manô mapawzy thliena ri a châ.

Missionary David Living Stone he reikah pahniapa châ thlyu vei. Missionary Training a kia chhôn Pastor ta daihti a vaw hnei awpa ta hrua ta, ABeipa noh zawpi apakhyna

liata, Biehrail botlâh â tlypa a rei khai nahta, “Unawh saih u” tahpa ta eithôn rei chanei ta, a reipazao awpa hnei khao leipa ta daihti ama pachhâ tahpa a châ.

Missionary ta la awpa a châ nota, “Kah chô leih-âpa missionary pathliepa cha,” tahpa ta ama tha chhie khai ta, uthei pakha chata a tôhki-tôkâ kheina vâta Africa râh lâta missionary ta ama pathlie. Ama chi chaina suzy siepa ta Thâtihipha chho lymâ ta, “David Living Stone y, khataih lâ e na sie chy aw?”, tahpa hiahrina ama hnei. “Eima hmia liata lâpi siena awpa lâpi Khazohpa ta eina pie chhôn zydua ei sie lymâ chy aw”, a tah.

Ano he Scotland Valanshire khih liata pih ta alaiseihpa a châ. Medical dawhty châ ta, Scotland liata khodâh ta khih a sa theipa, kyhpachâna pasyupalina vâta Africa lâ missionary ta asiepa a châ. Africa râh chariah chakeihzy a dyuh khe lymâ. Chakeibarôhhneipa a hrâhpa â dyuh nota, chakeibarôhhneipa chata ano cha a ku liata sei ta, a ku miakha a sy haw. Malaria pasana a dyuhpa ta, ano chhao malayria pasana a vaw hnei haw.

Africa mo cha sei ta a vaw patu tyhpa Mongyuh penawh tha ta â dyuh khe ei. Africa mo ta David Loving Stone kyhpachâna tha ta hmô ei ta, “Africa Paw (Father of Africa) moh phana ama pie. A thi no ta a ri kiahpâh liata Biehrail pakai chiehpâ hmôpa châ ta, Mt. 28:19, “Si ula, photo pachupa ta tao ula ...,” tahpa he â hnona (â nawna *or* mark) taopa ta hmôpa a châ. A ri he a chhu eita, a kyhpachâna palâsana ta a pathisao cha Africa râh lia pagu ei ta, a pôhpa cha Mongyuh râh lâta vaw phaoh

ei ta, Mongyuh r h London khihpi Webminster Arbey
Missionary zy thl su liata ama pabu.

Pach  awpa:

1. Pasaipha tahpa moh yzi cha   pasaipha tahpa n 
pyh ma?
2. Hebrai 11 liata Khazohpa pasaipha th tihzy hry
liata Mawsi (Heb. 11: 24-26) he pasaipha tatl h a
ch  na tah thei ma?



Achuna (18)

HNÔH SY LEI TA TÔH LYMÂ SUH VY

Zisu ta ahnoh ta a hyrai leipaliena liata a ku soh ta hnôhlâ aheihpa cha Khazohpa khihnarâh chyhsa tlâh châ vei tah ta. Luka 6:9.

Aleipaliepa liata a ku soh ta hnôh lâ a heihpa cha ei chyhsa tlâh châ vei. America satlia pakha cha ngôkhaoh chaopa ta Colarado lâ â thao. He daihti he ngôkhaoh ama chao lichih a châ. Maniah ama chao hilipa vâta a vaw chao hra. Thlakha thlano achao nata ngôh tharipa pha kawpa a hmô. A thapawh tu ta, a ngôkhaoh chaopa cha liahsa naih ta, o lâta sanawh nata viasa a pahrua awpa ta a vaw kua. A sanawh zy, a viasa zydua a pha tah eita, ngôkhaoh chaona su lâta ama si. Alei khaoh chaona khawzy ama chalei.

Ngôkhaoh ama chao via nota ngôh tharipa cha chyh via laihta, a lei haw. A sanawh nata a viasa thokha ama thâchhie ta ama vaw kuasai haw. A palôh pasi viapazy cha â pasai eita ama chao hualua. Thlakha amâ pasai tawhta ama hnabeidy ta ama vaw kuasai khai haw heih. Ano deita cha chao pazao lymâ ta, alô hra cha châkato ta, ano deita a chaopa cha a pasai thei khao vei. Ngôkhaoh nata khawzy cha amâ naopa ta zuah ta a vaw kua haw hra.

A chaleituhpa cha tha pawh kawpata, chhiah/ chao lymâ ta, hmiatua ta achhiahpazy ama kua saina tawhta 3 feet a chao nata ngôh hlô laipapi hmô ta, hneirôhpa lâta a pua haw. A kuasai hawpa satliapa ta â phahlapa he khâpa ma ama tah nota, satliapa heta ngôkhaoh cha eima pathipalôh pachâna liata ama chao tahpa na a pahno vei, tahpa a cha. Ngôkhaoh ei chao awpa he ei hmô hlâ lei vaw kua aw vana tahpa achhuahna a-ipa chhaota ngôkhaoh a chao vei ama tah.

Missionary Bruce Olson he Venezualla râhpathohpa liata a ypa Mutilun Indies zy lâta 1961 kô ta Thâtihpha chhopa ta â thao. Mutilun Indies zy heta Venezualla liata Columbia chyhsa meitipa khaoh achaopa za pangawh hlei thie sao eita, chavâta, Venezualla sawhkha nata Colombia sawhkha ta Mutilun Indies chipho pahlei khai awpa ta ama teikâna daihti chhôn a cha. Olson cha Venezualla râhpathopa liata a sie hai nota, “chhuah,chhuah” tahpa pyuhzy theita châmaih chhaopa châtaizy, tizy ta a phei liata a vaw lo hôlô. Chatawh ta Indies zy ta vaw dôh eita, chahry eita khieh lâ rahao laina chôta amâ pia haw. Ama Khazohpa lâta atheinahlâ awpa ta noh thôn chhôn ama hrai. Ama hraina nothôn chhôn achhôn parâ ta Khazohpa lâta atheina ama hlâ khoh khao leipa vâta zâ ta vaw pua ta, chyhsa phapazy yna khieh vaw tlô. A chhônparâpa atlâh tawh Matilun Indies zy yna lâ cha a sie heih. Patu heih eita hmiatua ama hraina liata ama hrai heih. Chatawhcha, pathi thlohpa sapa maihpa hri vaw hnei ta, khieh tawh ama vaw papua haw heih. Dawhmei apakhaipa helicopter ta hmô ta a pachha. Atlâh nata

Mutilun Indies khiih lâta a sie heih. Ei thôhna liata Indies zy ta thiepa pachâ khao vei ei. Thokha tiao ama viasa khoh ha bâ. Thâti hpa cho eita, awnanopazy ama y. Venezualla nata Columbia sawhkhazy ta Olson he aly kaw eita, ama President zy taihta ama khohkheipa a vaw châ haw. Eima ngiahpa cha palôh pasina hneipa nata achhuahna hneipa a châta hpa nâ pyh ma?

Reipahmaoh awpa:

1. Eimâ ngiahpa cha palôh pasipa hneipa nata a chhuahna hneipa a châ ta hpa nâ pyh ma?
2. Vailimapaw ta he rân liata Zisu bie ahnei hlâ via cha, Zaozi a paih lia kho aw vana ta hpa bie a reipa he ryuhi bie hawhta nâ pyh thei ma?
3. MEC Mission raihriana liata kô 50 chhôn hlao tloh thei âh leipa Mission Field zy he hnôh a sy sai awpa ta a pha na tah ma?

Ihlarâh
(September)

19

Achuna (19)

ZISU LIA DEITA PACHHANA A Y

Moh hropa a hy hnohta hmâta pachhana y vei, avâ ry liata chyhsa moh biepa hry liata miah pachha awpa moh hropa rai y va ei tah ta. Ht. 4:12.

2019 kô chhôn thâtih alâ luapa sakha cha, Chaina (China) râh liata hneirôh kawpa pakha ta, dawhtyzy âpamosa nota, Cancer pasana hnei chita, Step 4 na (*Pasana chhâpalih*) cha hawta, patlâh theipa châ khao aw vei chi ama tah nota, a hnabei dy kaw ta, a takâ byhzy thohna-o lâta vaw cheipa ta, dawhtyzy hnohta, na patlâh teh –u, takâ hluhpi nama khohnazie ei cha pie aw tahta, dawhty laipazy ta, patlâh theipa châ khao vei chi tah khai eita”. “Takâ ta tlâhna na pie thei vei, tlâhna hmâta achalei theileipa takâ he khâpa ei taona aw, tahpa ta a takâ byh pahy ta, takâ a hie chaimâh e,” tahpa a châ.

George H. Minn he hneirôhna achadai ta, Kodak Company padua ta, film byh chôta, “nâ ta camera eikha hmie la, ahropa zydua kei ta ei tao khai aw” tahpa châ roh ta, ahneirôh haw. Â môna room saita room 30 ahneipa o hneita, a niena su maih liata ao apuatheipa Organ laipapi a hnei. Châhrasala, thlahlôhna hnei vei. Mykha cha achakaotuhpa nata meeting ama hnei khai ta,

room chhôn a ngiata, “Ei rai ei pangoh haw, khâpa ei hâ khao aw” tahpa ta châ rohta, Meithei ta â kâsao haw.

Aopha, chhithai, hmi pha kawpa Mitamin (Châtuh nô) Marilyn Manro he chyhsa tota ama tlaichhai kaw. Khizaw pi ta Laihsa Manro tahpa ta ama pahnopa a châ. Anodeikua Khazohpa a pahno leipa vâta, a ly theileipa ta, pari theipa thohna Nebutol hluhpi dopa ta sasyh â thiesao haw. News paper ta Laisa Manro hrona pari theipa dollar thykha mâ ta adaih khao vei a tah.

1913 kô ta Chigaco khihpi liata khizaw liata ahneirôhpa mo 8 atyhna ama hnei. Amo hry ta, Jesse Livemore, Evan Kruger, Lizon Frezer, Viscount Caste Rough, Kilipung, FM radio apathaopa Edward Armstrong, general motor car design atao tua chaipa Althur Chevrolet zy cha amo sasyh liany amâ cheih, New York Stock Chairman Richard White nata America Cabinet member Albert Fall cha Lô-o liata a thi awpa ama châpa ngiachhi eita, ama o liata ama thi. Bethehem Steel company Chairman Charles Schwab he leibâh hluhpi chhaota a thi. A chô liata palâsapa chyhsa hneirôh hmipha sâseih zydua he Zisu Krista lia deita pachhana a y tahpa pahnopasia ha mawh ei sila, khatlu ta ma a pha bao vâma.

Pachâ awpa:

1. Zisu Krista deita pachha thei tuhpa a châpa khehta na pachâ?

Ihlarâh
(September)

20

Achuna (20)

ZISU PATHLATUHPAZY HRY TA NÔZY

Elizabe ta Mari ânaohna cha a pahno pata nata a chhi liata hawsaih cha a tlieh ta, Elizabe cha thlahpa pathaipa ta vaw bie ha ta. Luka 1: 41, 42.

Pachhatuhpa Zisu Krista pathla tuhpaZY moh paziahpa liata chanô (5) moh â hlao. Zuzy ta chanôzy he maluh reina liata pahlao beih vei ei. Mathai ta Zisu pathlatuhpa moh paziahna liata nô 5 moh a pahlaopa he pachâ awpa a châ. Mathai he chhiekheipa châ ta, zawpi pathluana pasazi a pahno chiehpa a châ. Zisu Krista liata chanô chapaw pathluana a y leina apalâsa khoh aw. Khizaw pi he Khasi râh, Nepal râh nata ahropa râh chyhta deileipa ta râh zydua chapaw bie hneina râh sai a châ. Zu zy nata chapaw bieheina râh zydua liata chanôzy cha chapaw tovyuh to thei vei ei.

Chanô mohnaona, chanô mopahnaina, chanôzy chapaw tlu ta pasô leinazy a y. He he Mathai ta a dyuhpa ta, “Zisu liata chanô y vei, chapaw y vei, Zu yvei, Zenitai y vei, sei yvei, khotalaipa y vei, miakha sai ama châ”, tahpa â duakhei. Izarel prime minister a vaw châpa, Golda Meir bie reipa a pha kaw.

He chanô ta he hawhta a reih, “Davi awhsi (David Star) ki charu ahneipa poh zawpa ta, Izarel râh padua

tuhpazy hryta ei hlao thei hrpa vâta ei palôh eina châ kaw. Chapawzy nata rai ei hria khoh nota, chanô ei vaw châpa ei ngiapachhina dikha hnei vana. Chanô ei châpa vâta ei nawh viana miakha hmâh a hmô hra vana. Saw ei phaopa he runahna ta hmô hra vana”.

“Anodeikua, ochhôh nata zawpi châta raihria ahneipa chanôzy cha, zawrâpha chanô tlymâ chapaw tlymâ hlâta lino ta ama phao ahluh via. Pawzy bao khâna ato leipa nôzy chhochhi zawrâpa chanô/chapaw hlâta ama phao lie thôh â hri via. Chhôhkha mohôhna liata baotuhpa ahneileipa nôhmeizy ta ama thei thai chai aw”.

“Kei ei raihriapa cha, Izarel chyhsa to tovyuh ama khotha châ vei. Taovyuh â khopa ta piepa a châ. O sana, lyu taona, lâthloh chaona, pheisaih nata chapaw ta ahria theipa raihria to liata chanô chhao ama hria theipa kyh a châ. Chanôzy he beihchho, beihphiah pasina nata sawnawh mohôhna lia deita khawhlô leipa ei sila, tlâhrai nata zawpi raihriana to liata amâ hlao thei awpa ei khoh”, a tah.

Pachâ awpa:

1. Chanô rai, chapaw rai pahrua pachhah leipa ta, chanô chhao chapaw chhao zawpi rai, tlâhraizy hriapa châ sala, eima hmah a sie via nata na pangiasa theima?
2. Eima râh liata saku kiana liata chanôzy ama hluh via ngalâpa he eima râh pha viana a châpa ta hnabeiseih â chhih ma?

Ihlarâh
(September)

21

Achuna (21)

THINA TAIH NGÂCHHIHPA TA CHAKAONA

Pasana tao awpazy he chi khô, nathlie teh pasiapa ta nama y thei nawpa ta a hripa ta nama hry liata chyhsa thokha lô-o liata a cha khô aw ei. Chatawh cha noh hrawh riethei pasana nama tao aw, thina taihta ngâchhihpa ta y te. Chatana chata hrona lakho ei cha pie aw. Biephuah 2:10.

William Carey he “Chhâ thieh missionary zy Paw” mohphana a topa, India râh missionary a châ. Kô 16 a tloh nata pheiky bie a chu ta, a satliapa ta a pipathi. Kô 19 a châ nata lapinô a hnei. India râh lâta missionary sie khoh ta, a paw nata a lapinô ta khoh kheh vei ei.

Eikha cha missionary sie awpa akhohna kyh Awnanopa uhtheizy chho ta, Awnanopa macha pakha ta, “Hawtipa a tyuh teh, nâ nata kei abyuh (a ngiah) leipata Khazohta rânzohpa a pakhaisa thei thlana” a tahpa cha tha ta a hnabei dy ta, ‘Keimo pakha chyu he Khazohpa ta maniah apeimawhpa vâta, a sawchapaw matlupa chhao pahlôh leipa ta maniah a piepa châ ta, khâpa vâta uthei pi ta, kha hawhta bie a vaw reih thla haw’, tahpa pachâ ta a novâh thei vei.

Carey cha a lapinô hnohta India râh lâ missionary sie awpa chhota, akhoh leipa vâta a sawchapaw kô 8 pa,

Peter achhipa ta India râh lâta ama vaw thao. Balyh ta a kuakhei ei. He hawh balyh hropa ta, ama vaw thao heih. A lapinô ta akhoh leina chôta a vaw zi ei. A lapinô ta England lâ kuapa achhopasua lymâ. Lâpi tlykha nata India râh tlô ei ta, missisonary raihria ama chakaona taihta, a lapinô he ahnatlâna tla pahnai lymâ ta, ama sawchapaw Peter cha accident ta â vaw pahâ tawh chhochhi cha, tha ta tao pasa ta 1807 kô ta a pahâ pâ haw. Kô 7 chhôn ngiapâtuha chhao hmô thei veih ei. 1812 kô ta hmo a sona o meita akâ lilaw ha heih. Cha liata Grammer nata Dictionary, Bihrai a palie chiehpa a pasô ngaitapazy mei ta a kâkhai haw.

Carey duasu he hnabeidypata missionary raihria khaoleipa ta England lâta kua bawlaw awpa duahmo liata ay. Anodeikua, Carey cha a raihria bâ sai leipa ta hnabeidyna chiatlao hryta zôpha kawpa ta dusawtata chatôh lymâ ta, pahniena poh a zawh thei haw. “Ei thi tawhta mo pakha chhâ ei thâtih a roh khoh khiah kei cha viachao tôhpa tlymâ, naw tôhpa tlymâ chiatlao hryta zôpha kawpata dusawtata rai ahria hualuapa ta eina hmô khiah, ei thâtih dopa a roh thei aw. Asaomâ kawpa, hlao atloh chatlie laipata eina roh khiah a roh chhei kaw aw”, a tah. William Carey he dusawtata, zôpha kawpa ta tiamana ta hlao atlohpa chyhsazy hry ta pakha a châ hra.

Pachâ awpa:

1. Keimo chhao palôhpasi kawpa ta, zôpha kawpa ta hlao eima tloh hlâ lei tahpa achhuahna pi kawpa hneipata, tiama pazao lymâ ei sila, eima khoHPa hmô thei hra aw ma?
2. Athaona 1:17 liata rietheina cha chhiesana vâta châ ta, Zisu Krista zawhzi ta rietheina cha byhnâ tona lâta a vaw châ haw tahpa bie he nâ pyh thei ma?

Ihlarâh
(September)

22

Achuna (22)

**ABEIPA LIATA NATA A THATLÔNA LIANA
CHATA HMOTAOTHEINA HNEIPA TA Y TEH U**

Achhâ chaina ta cha, Abeipa liata nata a thatlôna liana chata hmotaotheina hneipa ta y teh u. Eph. 6:10.

News paper liata khizaw liata a tha tlô chaipa tahpa ta bâhlô laipa pôraoh phapa motor car laipapi achalopa nothlahpa ama vaw tawh. A hmôtuha maihta, ano tlaita truck car laipapi achalopa ta hmô eita ama reithai. Liahsa tata amoh pasia tuhpa zy ta, Crane ama tahpa hmo ahripaziezy a chalo theipa khaw ta achalopa chata, steel ripa ama hmô. Cha hawhta, khizaw liata thatlô, riahpha hmotaotheipa zy he amo thatlô hmotao theina châ leipa ta Khazohpa hmotaotheina achâpa amo tlaita ama palâhâh. Laisa Willianetle Rudolf he Movyhpa Negro chhôhkha sawnawh 22 hryta 20th na a châ. Ama chhôhkha ama sipasa kaw. Chatawhta, poliza pasana vâta kô 13 taih chôchahrei leipa ta si thai vei. Kô 13 a châ tawhta a pheizy a tha a tlô thei nawpa tanoh chareih â râ. Vaw tlâh via lymâ ta, 'khizaw liata a râ chatlie chaipa ei châ hlâ lei ei râ lymâ aw', tahpa achhuahna laipa hneipata, a râ a chu pazao lymâ ta, ano kô 20 (1960 kô) khizawpi arâpasuana Olympic liata a râpasua ta, meter 100, meter 200, meter 400 liata a chatlie chaipa châpa ta ngôh medal

sâthôh a hmô. Khizaw ta a râ chatlie chaipa Wili tahpa ta ama pahnopa a vaw châ haw.

Thomas A. Edison he a nahpâ ta a hawti nota saku hyutuhpazy ta châ pachu thaipa châ vei tahpa ta saku ama papua hawpa a châ. A raihria liata pahâh ta, tiama ta Electricity nata meipaw, battery zy a tao thai tua chaipa, Great Inventor, Great Scientist a châ, pychhai chhao châ athai leipa ta scientist rôhnah chaipa lâta â vaw lie. Edison he palôh pasipata raihria tiamapa châ ta, battery oh a tao no chhochhi ei sahkha nata za palih hlei atao chanei tawhta atlohhlao tahpa a châ.

Eikha cha ama workshop he mei ta kê ta, a hmotaopa hluhpi mei ta a kê khai haw. Journalist zy ta, “Palôh pasi tiama kawpa tana hmotaopa hluhpi dawh no chhôn liata mei ta a kê khai ha nota khatluta nâ ngia roh?” tahpa ta bie ama hiahri. Ano ta â chhupa cha, “Khazohpa y ta, kei hroh chy nata, tiamana hro ei hnei thlahpa vâta, khahmo zydua kha adaihti liata a vaw y heih baona”, tahpa a châ.

Pachâ awpa:

1. Marapa ta hlao eima tloh theileina he palôhpasina hneileipa pita, tiamana eimâ phahlapa he a châ tahpa nâ pyh ma?
2. Khâpa vâta ngiapâna a hneipa Marapa saw ama palôh a pasi thei vei?



Achuna (23)

EI NGIACHHINA NA CHÂTA Â DAIH

Châhrasala ano chata ei hnoh ta, na ngiachhiena nâ chata adaihna. ei hmotaotheina he chieh leina liata pakipa ta a y mâhta tah ta, chatana chata Krista hmotaotheina cha ei chô ta a y thei nawpa ta a ly ngaitapa ta ei chiehleinazy he tlaô ei palaikhei ha aw. 2 Kaw 12:9.

Noh kha he avâ thata suah ta, Mr. Bill Eaton o he alei ta a palâ haw. O he kô (23) chhôn ama vaw tlô hawpa, Krisma kyhchhi, nô pakiana kyhchhi zy ama vaw hmâ hawpa, room (4) a hneipa, ama pasô kawpa o a châ. Pachhana Department luhpazy he o he pachha theipa châ khao vei ama tah nota azipa Bill Eaton nata Li Eaton cha ama ngia â chhie kaw.

He o alei ta a palâ hawpa he kheita na hmô? Zuzy ta kheihtha ama pachia aw? Burma nawhta kheihtha ama pachia? Mara mo ta kheihtha ahmô? Biehrai parohpa daihti nohta, Zuzy ta cha, Khazohpa adyuh eita, Kaorâ, Datha zy hawhta Khazohpa ta ahriepa ta ama hmô thei aw? Abeipa Zisu daihti nota Zuzy ta, ama moleina ty ta ma hmô thlyu aw. Thokha natural disaster ta ama hmô aw. Mr. Bill Eaton nata alapinô Li Eaton he ngiapâtuha châ ei ta, amo hmôna cha, Khazohpa ngiachhina

hmotaotheina vâta o thiehpa , o pha viapa sa nawpa pahaona ta ama pachâ.

Kô 5 chhôn o lai viapa, o pha viapa, room hluh viapa, concrete o sa awpa planning a tao eita, ama sa thei haw. Khazohpa rôhnahna ta ama pachâsa. Eikha he Marapa khihkha liata o mei a kê. Ozi penawh ama y vei chhôn châta, khâpahmâh la veih ei, a kê khai haw. O a kê hapa cha tho âpa tôtlâh, siphia tho âpa, abâ (pâhchhôn) cha adaw, ngiadi o a châ. Awnanopa nata sanawhzy thapi phia eita, kôkha chhônhta, tho-âpa-o, râhvâ diapa, o pha via syulyupa ama padua thei. Awnanopa ta vaw baokhâ eita, beihphiahzy poh nata chysiazzy mei a kê hawpazy hlâta ahluk via syulyu ama pie. Khazohpa rôhnahna lâta â lie haw.

Rev. Dr. Pa Hrang he saku a kia nota, Mathematic thai thaileipa ta, Khazohpa lâta Thlahchhâna ta Mathematies liata marks 80 chônla saita ei hmôn haw, tahpa ta areipa keima nahkhaoh tlai ta ei thei.

Pachâ awpa:

1. Khazohpa ngiachhina na châta â daih tahpa he na châta kheita na hmôn aw?



Achuna (24)

THA NA PATLOTUHPA LIATA ATO EI TAO THEI

Tha nâ patlôtuhta liana chata a to ei tao thei. Philp 4:13

Apostol Pawla he Missionary rôhnah kawpa châ ta, Thâtihtpha a chho nota a pakhâ padiepa ta ahmôpa chiehleina a hnei. He chiehleina he khapa ma tahpa asiapata pahno thei mapi. Malaria pasana a tahpa y ei ta, a mokhaoh mozopa a tahpa y ei ta, thokha hmahchhiepa khiah maw tah ei ta, pangiasapa sai a châ. A tlâh nawpa ta Khazohpa lâta thlah a chha. Chyh-eina a hmô tawh Apostol Pawla ta, “Ei chiehlei no maihta ei tha a tlô” a tah.

USA Mashal University Journal Department liata Prop. Willian Page Pitt he mochaopa a châ. A hawtino kô 5 a châ nota amo rao ta, hmô thei khao vei. Ano ta a bievaopa cha, “Tha nâ patlôtuhta liata a to ei tao thei (Philp 4:13) tahpa a châ. Mochaopa saku liata saku kiapa hlâta aviasazy chhaota sawhkha saku liata achupa khohta, a viasazy cha ano châta châ ama reipâpa tyh awpa ta â haw tyh ei.

Chahawhta, pahua leipa tiamana (Ravsmhaom ZGJ) ta achu lymâ ta, Professor a vaw châ. USA râh zydua liata Professor pha chaipa moh phana chhao a to. Eikha cha

College hawti pakha ta, khizaw liata ngiachhi chhich chaipa he mochaopa maw, nahpâpa maw, kusy pheisy pamaw?, tahpa ta a hiahri. Ano ta, a vaw chhupa cha, “Mochaopa châ vei, nahpâpa châ hra vei, kusy pheisypa châ hra vei. Achhuahna hnei leipa ta, raihria awpa sianopa hneileipa ta, raihria awpa ta thapawhna hneileipa ta hmia zô pazipa ta hmiaphao ahri kawpa ta noh chareih a ypazy he khizaw liata ngiachhie chhich chaipa ama cha” a tah.

Professor Pitt ta, ano saku hawtizy cha, “Zawrâ vâtlâhpa châpa ta, ei college liata nama ypa châ vei, athai chai, apha chai, asaomâ chai châpa ta, sohna achupa nama vypa achâ hi” atah lymâ ei. Na chariah laichaipa, nâma sasyh na châpa nâ pahno hlâ lei, na hrona cha hmahsiena a thao mâh vei. Khâpa vâta ei tao thei vei tahpa na chho kha, kheih hawhta tao aw sala ei tao thei aw tahpa dei ei thei khoh. Runahna a vaw ypazy he reina hnei pahâna ta hmâh leipa ula, pahaona ta hmô la, Khazohpa ngiachhiena ta ei pahnie aw tahpa ngiapâna chôtâ, pahniena pohna zaw hlâ lei pahualeipa tiamana ta pazao lymâ ta, pahniena cha khataih lâ hmâh a râ vei. Reina hneina cha keimo sasyh eima hmah liata a lôhtihrypa hawhta a châ”, a tah tyh ei.

Pachâ awpa:

1. Khazohpa NGIACHHIENA atopa atahpazy pita, khazia hmotao theina eima hnei vei? (khazia, pahniena eima hnei thei vei?)

Thlarâh
(September)

25

Achuna (25)

KRESAWTI CHA A DAIH KHAO LEIPA TA

Zawhana 2: 1-11 (Biehrai ei rei awpa he, nâmo Biehrai lia tahpa namareih aw).

Nô pakiana liata kresawti chhâ ha ta, Zisu Krista ta ti tawhta Kresawti apachâsana he Abeipa Zisu hmo no-âh tao tuachaina tahpa ta Thâtihpha Zawhana ta miah a chho. Abeipa Zisu hmo no-âh atao tua chaina su he Achhyna o liata châ leipata, Awnanopa kyhchhi zawpakhô ku liata châ hra vei.

Chyhshapa eima kyhchhina lâsi nôpakiana liata a châ. Cha hmâhta , dychhie chaipa sa nata lao a tôh theileipa kresawti ta nôpakiana kyhchhi liata a châ. He heta, Khazohpa cha eima ngiapâpa vâ deita kyh miah a pachâpa châ leipata, chyhshapa eima kyhki, eima lâsi liata miah apachâpa, pahla noza eima tlapa maniah a pasai leipa achâpa eima hmô.

Chatawhta, nôpakiana kyhchhi liata zawpi hrua pita, niedo eima pa pahlasapa he hmiachhie nozâ chhih ngaitapa a châ. Cha duahmo cha Kena khih liata myuh hneituhpa heta atlô hawpa a châ. Zisu y vei tlai sala, khih chhao sa ngâh khao aw vei. Zisu achahraoh ta, ti cha kresawti apachâsa tawh kyhchhina cha hmia kaipa ta ama pachhâ thei.

Chyhsa pakha College a kia hai no ta, a thâti he hawhta eina chho. Keima college kônona ei kia ngâla nota a cha. Kô chhâna ezana awpa liata ei chhoh eina parâ. Châ amo thei vana. University thohna o liata chyhsa bie khai eita, kei châta su y khao vei. Dawh no padai ta toilet lâta a râ lymâpa a châ. Thlah ei chhâ. “Atamy ezana he dawthoh chhoh châta, Khazohpa y! na ngiachhie la, dawthoh chhoh chhâ na patlâh ma y. chata leipata kôkha tlai ei fail khiah kei cha college apazao theipa châ vana” tahpa ta my ta thopi ei doh.

Ezana room lâta ei ngia hlata toilet lâta eikha ei si. Dawthoh chhoh ezana chhoh zydua ei tlah. Ezana daihti dawh thoh atloh nata toilet lâta ei râh. Chahawhta, noh no tla vana. Ezana cha noh palih chata, ahropa noh cha ei tlah haw. Châ ei mo theileipa vâta chatlupo eza thei vana. Chahasala chhohmona ei hnei. Result a vaw pua. Kô hrono hlata tla pahnai hlei vana. Grade IV ei hmô. MSc achu theipa marks a cha.

Pachâ awpa:

1. Khazohpa cha nôpo nohta baotuhpa ahnia thlahapa a châ (Hla 46:1) tah ta, kheita na pacha? Achabao hawpazy pacha nailaih teh.

Achuna (26)

THÂTIHPHA TLÔ NOH : THÂTIHPHA VÂTA RYU TONA

Cha bienyupa cha he he a châ. Thâtihipha vâna he ta Krista Zisu liana chata Zenitaizy he ryutolâhpazy, pôhpa pachiahpazy, bietaihipa atopazy keimo zuzy hawhta ama châ hi Eph. 3:6.

Mara râh Thâtihipha a vaw tlô tawhta 2020 lia he 113 a pha haw. He daihti liata eima biepipa Thâtihipha vâta ryutona tahpa bie he atlâhpipe rakha ta ei vaw palâsa aw.

Thâtihipha :Thâtihipha tahpa cha Zisu Krista hrona nata chakaona zydua he Thâtihipha tahpa cha ta, Zisu Kriata thina nata thyuheina vâta Paw Khazohpa nata aryhna miah taopa ta, baotuh awpa chata thlahpa Pathaihipa a zuna zydua he Thâtihipha tahpa a châ.

Biehraireiawpazy :Rawma 1:16,Luka 2:8-11, Rawma 10:15, 2Thesalawnika 3:1, Philipi 1:4-5 Luka 4: 43, Hmotaopa 14:21-22, Mathai 11:5

Ryutona: Zôel 3:2 liata Izarel chiphozy cha, Khazohpa ryuto” tahpa ta eima hmô. Ephesi 1:11 ngiapâtuhpazy he Khazohpa ryu châta tahpa ta eima hmô.

Thâtihpha vâta Khazohpa ryu a to theituhpa eima châna dei châ leipa ta Khazohpa ryureina lâh chana chhao a cha. Ano ryureina a châna cha, Khazohpa ta kyh a pachâ ngaitapa, atobi khoh ngaitapa, apalyupalih kho ngasapa eima châna he a châ.

Biehrai rei awpa – I Pity 1:1, Ezekiel 5:2-3.

Achuna (27)

ATAHMÂ HE KHAZOHPA SAW EIMA CHÂ

Pharisaihzy hry liatahpa chyhsa pakha amoh Nakadima, zuzy hyutuhpa a y. Cha chyhsa cha zâ ta Zisu lâ a vy ta, a hnoh ta "Rabai, Khazohpa tawhta pachutuhpa ta a vypa na châ tahpa ei pahno. Khazohpa a chô liata a y leipa khihtala he hmonoâhpa na taopa hawhpazy he a hyhmâhta tao thei aw va ei" tahta. Zhn. 3:1,2.

Eima yna khizaw he reipasaona yna râh châ ta, buakha pachâ pasina tawhta reipasao tuhpa vâta sasyh liany a chei nawpa anao kaw. Pathipalôh pachâna lâta dawty bie reipa cha, "Atahma chhâ satlia laisa dawpa hluhpi cha, einô eipaw ta na pachâ khao vei ei. Ei viasazy chhao na pachâpa y khao vei ei. Ei hropâ y vei tahpa ta sasyh amâ thiesao lymâ", a tah. Nô machâ paw machâpazy ta, ei sawnawh ta na mohôh khoh vei ei, ei hropâ y vei tahpa ta sasyh liany ama cheih. Chatawhcha, sasyh amâ thie chy ta, na hropâ y khao vei. Sasyh athie sao teh tahpa ao ama theipâ ama lyu a tah.

He tluta chi chhihpa, Khazohpa pasaileipa sasyh â pa-
aosaona tawhta abohna cha 1 Zhn 3:1,2 bie, "Pacha te-u,
Paw ta kyh miah apachana cha thata a châ kawdia.
Khazohpa sawzy ta maniah a bi haw. Cha hawhpa cha

eima châ tlaina. Atahmâ he Khazohpa saw châ pita ...”
tahpa Khazohpa bie he a châ. Khazohpa ta thata kyh
miah pachâ ta, a ngiachhina vâ deita, a saw ta miah abi
hawpa he rônah ngaitapa a châ. Khizaw liata ahneirôh
chaipa châ la, Khazohpa saw na châ vei khiah,
khâpahmâh phahnai vei. Ph.D degree po (10) chhao hmô
ta, Khazohpa saw na châ vei khiah na palôh châ hlei aw
vei.

Politic lâta molai châpa ta, Noble Prize saita sâ (3)
chhao hmô ta, Khazohpa saw nama châ vei khiah na
hropâ y vei, chavâta, Khazohpa saw eima châpa he
khizaw liata na vâhneina laichaipa chata, khâpahmâh
atlupa y vei. Na nô na paw ta cha pachâ vei hrasa,
Khazohpa ta thata a cha pachâ thlahpa vâta â ngiahma
awpa châ vei. Na viasa lôkhypa nata na vâ-iapazy ta cha
pathlua hra ei sala, Zisu ta cha pathlua beih vei. Khazohpa
ta cha pachâ ta, a ngiachhiena ta a sawchanô/
sawchapaw miah abipa â pahnopasiana heta sasyh liany
acheina khôkhah theipa a châ.

Nohkha he, laisa pakha cha ku apatu awpa noh liata,
ava-iapa ta pathlala ta, ahmia chhiepa atao khaoleipa
vâta, a pahno beileipa achhyna o liata a vaw ngia. 1 Zhn
3:2 liata, atahmâ he Khazohpa saw châ pita, vâ-ia ta
maniah a pathlalapa chhao, taka ta maniah a pathlalapa
chhao, hrâhrâta maniah a dyuh eita lô-o miah ama
patâhpa chhao, Khazohpa saw eima châpa alyna miah
paraopa thei vei, tahpa ta Pastor pakha ta a vaw rei nailai
lichih a châ. He noh tawhta ama pathlalapa laisa chhao
pipathi ta, Khazohpa ta a vahpa pha kawpa kôno khaita

2020 Apahrana Chhihthana Bu

pie ta, cha laisa ta a rei tyhpa cha, “Ei va-iapa ta eina pathlalapa kha aphaña, chata leipata atahmâ ei vahpa he a tyh thei aw vana”, a tah.

Pachâ awpa:

1. Atahmâ he Khazohpa saw eima châ tahpa he khatlu ta na châta mâ a hnei?

Ihlarâh
(September)

28

Achuna (28)

KHAZOHPA PEINA AHRIA TLAMAW HAWPAZY

1. JOHN LENNON

Ano he Satlia hmiphapa, hla a phi thaipa, hlasa thaipa ao phapa, Rock music group lia tapa châ ta, ano tlaita BEATLES phu a padua. A lualâ kawpa a châ nota, bie hiahrinazy ama tao. Cha liata, “Krizyhpâ he alei patoh aw. Zisu Krista chhao he keimo BEATLES sahlaozy tluta chhao châ vei”, tahpa ta apalaipatei kawpata bie a reih. Ano he daihti rei leipa liata chyhsa chhiepazy ta ei charu meithe i ta ka eita a thi haw.

2. TANCREDO NEVES

Brazil President châ awpa ta amâ chhu nota, vote 500,000 ei hmô khiah president châ leiawpa ta Khazohpa hmâh na pakhâ thei aw vei tahpa ta zawpi hmia liata reih ta, vote pathla eita vote 500,000 hlei hmô ta, President a châ awpa nohta, pasa ta a thi haw. President dyuchhai liata atyuh hmâ khao vei.

3. CAZUZA

Ano he hla a phi thaipa, hla asa thaipa ao phapa châ ta, zawpi hmia liata hla ama sa nota, châhna mei pazy ta,

a khu cha, “Khazohpa meihu he ei chapie” tah ta, pachao cancer vaw hneita, ano kô 32 liata a thi haw.

4. TITANIC balyh taotuhpa

A baly taopa pha kaw ta, Zawpi hmia liata, bie ama hiahri nota, “Khazohpa hmâhta parao thei aw vei” a tah. Titanic balyh cha chyhsa 2205 kiah eita, April 25, 1912 noh ta Attantic tilaipi liata rao ta, mo 705 pachha eita, mo 1500 ama thi.

5. MARLIN MONROE

Khizaw liata angiachaipa tahpa ta khizaw pi ta ama pachiaipa laisa pakha a châ. Hneurôh kaw ta, a-ao pha hlasa thai, amoh pathâh kawpa a châ. Thlahpa Pathaihpâ tuapa ta Billy Graham ta Thâtihpha chhopa ta a tlyh. Ms Monroe deikua, “Zisu Krista abyuh vana” a tah syulyu. He tawhta, hâta eikha a châ nata, Laisa Monroe ta a rakhô liata a ri ta ahuapa a châ. Ano sasyh liany a cheipa a châ aw ama tah.

“Ngiachhiena no-âh chhih” tahpa hla a phi tuhpa John Newton. Hla 16:2 Ngiachhina deileipa ta kei liata ei rei nailai awpa phapa y vei”, a tah. John Newton heta Khazohpa reithaina hla 280 phita, chazy hryta a khoh chaipa cha” Ngiachhina no-âh chhih (Amazing Grace) tahpa hla a châ. Ano hro tawhta he hla rônahpa he a phipa a châ aw. A hawti kô 6 liata nôpawzy ta ama thisai haw. Ei nô, ei paw atah awpa dadei ahneileipa , a paw a nô kyhpachâna vâti hriapa a châ. Hârâ chhiepa a châ

tawh ama heinawh o liata ama pa ysa. Ama sapa ama saw hmeiseihpa a châ lei tawcha, ama sawnawh hmeiseihpa hawhta kyhpachâna ama hnei vei. Okha tawh okha vaw papua lymâ eita, a yna awpa o chhao hnei khao vei. Achhâna liata lâ hlapi liata a ypa a sanawhpa ta a vaw aw.

He a sanawhpa he Khazohpa a pahno leipa, Thlahchhâpa ahmô khoh leipa a châ. John he anô ta, Khazohpa ngiachhiena aphanazy nata Thlahchhâna zy he a hawti noh tawhta a pachu hapa a châ. Anô a thipa chhao, he he my thei vei. A paw chyhpa heta John thlah achhapa ahmô nota khoh leipa ta, tha ta a tu. A ei hluhpi ataochie lymâpa vâta tao thei khao leipa ta, hawtipâ pata Navy angia. Training a patlô tawh Abeinawh Navy ta rai a hria. Discipline nata arairu tupa vâta hria angâ khaoleipa ta Africa rah lâta â râ haw.

Portuguese dyupaliepa nata ahmô eita, ama hnohta y ta, tilaipi asiepa balyh ta a y. A lapinô he chhie kaw ta, sahroh hawhta niepazy a thypâ tyhpa cha atao ru tah kawta, â râ heih. Nohkha cha tilaipi ngiakâ liata apuapa hluhpi apatohpa hmô ta, mei ta a rao. Tilaipi liata asiepa balyh pupa ta meikhu ahmô nata, sei azuahpa tlymâ, siah naoh azuahpa tlymâ a châ aw, tahpa ta balyh chyhpa ta a vaw pangai nota, sei tlymâ, siahnaoh tlymâ azuahpa châ leipa ta, viavipa satlia John cha a hmô nota, hnabei dy kaw ta, John cha lâpi chhotuhpa ta â chhi.

Nohkha cha John ta sahma beihrai laipapi hmô ta, pahy ta, balyh a kiah pazy padosa eita, ama pari khai. Balyh pupa ta a vaw pahno nata, a hihâh kawta, John cha

patu eita tha ta tu eita hro pachhana balyh ta tilaipi liata thy eita amâ râ sai. Thata hmâh phaohta, Khazohpa ta pha vei atahpa vata vâsâ ta ngiakâ a vaw pua. John ahro â nanona he asiapata pahno thei khao mapi. Thokha ta tilaipi liata ama thy nota hro angâ khao leipa ta, hro Khazohpa lâta Thlahchhâ ta ngiahkâ vâsâ ta avaw pua thei nota ahro â nano tah eita, thokha deikua Negro sei ta a phao nota, eikha cha Antlantic tilaipi liata thlihpipe ru ngaitapa atyh ta, a balyh nata ahrona aboh nota ahrona anano ama tah. John Newton cha a vaw nano ta, Khazohpa ngiachhina vâta Pastor laipa bishop (Anglica Awnanopa liata) a vaw châ haw.

Pachâ awpa:

1. Khazohpa cha chyhsazy ta ama koh thaileipa chhao ahmâ hialiapa pastor dyutlaipa ta a tao thei.

Ihlarâh
(September)

29

Achuna (29)

KHAZOHPA AO

Mo hropa zi leipa aw ei ta, tlaô âmâ răsai aw. Mo hropazy ao cha ama pahno leipa vâta tahta. Zhn. 10:5.

Ngiapâna liata Khazohpa ao theipa he khâpa zydua hlâta a peimawh chai. Khazohpa bie, Khazohpa ao, Khazohpa pakah bie tahpa he miakhapa châ ta, eima Biehrai ta ahawrawh hmâpa phono a y. Krik reih ta Logos tahpa he miakha châ ta, Abeipa Zisu he a châ (Zhn 1:1), Abeipa Zisu ta Biehrai chabu zydua he ei thatih ama roh a tahpa hawhta, Biehrai liata Abeipa Zisu thatih zydua cha logos châ ta, Khazohpa anano beih leipa châna palôhphaoh tagna yzie a hnei. Chatawhcha, Krik reih ta Rhema ama tahpa chyhsa ta hroh thei vei ei. Khazohpa pakah bie to apuapa ta chyhsa ta ama hroh aw tahpa (Mt. 4:4) he “Rhema” a cha.

Khazohpa châbie, Bihrai bo no, bothôn na reipa liata Khazohpa ao (Rhema) thei leipata na y thei. Khazohpa bie, Biehrai châh khana reipa liata Khazohpa ao na thei thei. Anodeikua, Khazohpa ao na theipa cha Biehrai bie nata âhmie vei khiah tala, Khazohpa ao châ vei. Thokha ngiapâtuhpazy cha ao ama theipa tlymâ, chhôn lâ pathipalôh liata pahnona pasâhsa eita, Khazohpa bie

Biehrai nata chhituhpa pastor nata hyutuhpazy ama mohnao nota, Sata ao cha Khazohpa ao ta apy tlamaw tyh eita, Khazohpa bie a pahnopa hyutuhpa nata Pastorpa kha amâ dyuh tlamaw tyh. Khazohpa bie a pahnopa hyutuhpa nata Pastorpa zyta pado khoh eita, padopa theipa châ vei. Eima palôhrupa liata ao eima theipa nata Khazohpa bie anano no ta Khazohpa bie eima py awpa â byuh (1 Zhn 3:20).

Atano, Khazohpa bie rohpa nata eima pahnona parohpa angâpazy eima hluhpa he eima ngiapâna azeih khoh. A eih via pachai ta, Hyutuhpa, Pastor zy Khazohpa bie zawpi lâta ama phuahpazy he lâchao chhohpa zawpi lâta a tôpa hawhta eima lyu. He heta zawpi Khazohpa bie nahthli maniah a aipa a châ. Khazohpa bie thiehpâ achâleipa vâta, eima bie a theipazy ananopa y vei vei. Eima bie chhopa liata Thlahpa Pathaihpâ ahlaho vei. Chavâta, Awnano chhituhpazy eima hlâ via awpa âbyuh. Eima khôtho chyhsa ao châ leipa ta, eima chhônâ chyhsa Thlahpa Pathaihpâ ao eima papeisa via â byuh aw. Biehrai eima rei hluh awpa â byuh. Cha liata Khazohpa ao theipa ta eima nah eima pachôn via ahaw aw. Hmotaopazy, eima hmô theipazy tawhta Khazohpa ao thei thaipa ta eima mokhaoh, eima nahkhaoh eima pachôn via awpa â byuh aw. Eikha cha laisa pakha he ao miakha a theipa cha, “Molei angiathaipa châ vachi, maniah a ngiathaipa ama châpa chhao”, tahpa a vaw thei. Ahripa ao tahpa ta Hyutuh Pastor zy ta chho chaimâh ei ta, apathlai thei khao vei. Apei kaw. Awnanopa sahlao ta Hyutuh Pastor zy rei eimâ ngiah

awpa peimawh kaw awta. Achhâpa cha eima thlahpa miah avaihtuhpa châ tlôh eita.

Pachâ awpa:

1. Khizaw liata ei peimawh chaipa Khazohpa ao theipa a cha ma?



Achuna (30)

THLAHCHHÂ CHYH-EINA

He he ano chô ta eima riahphana cha a châ. Khâparai akhohna zi hawhta eima hia khihta ano ta maniah a nathlie tyhpa hih, Khâparai eima hiapa maih maniah a nathlie tahpa eima pahno khihta cha ano lâ ta eima hmo hiapa cha eima hmô haw tahpa eima pahno. 1 Zhn. 5:14,15.

Ngiapâtuhpazy châta Thlahchhâna he a peimawh kaw. Khazohpa tawhta Thlahchhâ chyh-eina bietaih hnei veih ei sila, ngiapâtuhpâ cha hroh thei aw mapi. Chavâta, ngiapâna nôpawpazy ta Thlahchhâna cha ngiapâtuhpazy hro husona ta ama reipakho tyh. Thlahchhâna mo ta hmô theileipa Khazohpa lâta Thlahchhâpa a châ nota, achu awpa hluhpi a y. Thlahchhâ chyh-eina he kheihta ma? Thlahchhâ chyh-ei leipa a y ma? tahpa zy hi.

Thlahchhâ chyh-eina pho 4 pazy eima palâsa.

1. Hmo ama hiapa cha, cha hmo tlai cha ama hmô. He hawpa Thlahchhâ chyh-eina he moto ama pahnothai kaw. Ngiapâna hawtipazy taihta ama pahno thai. Chysia a hiah, ahiapa chysia a hmô. Châ athai thaileipa Subject thai theipa a hiah. Cha Subject liata a tiam. Athai thei haw. Car a hiah, o a hiah ama hmô.

2. Ahmo hiapa piepa ta ama chyh-ei, Anodeikua “Hâ chy teh” tahpa a châ. Hâ chypa a byuhpa chyh-eina.
3. A hmo hiapa pie thei leipa ta chyh-eina. A saw hawtipa a paw liata chaizô tiah ngaitapa, chapâna chôta a paw ta ahmâ thailei awpa pahno ta, chaizô pie leina ta achyh-eipa hawhpa a châ. A Thlahchhâna ama chyh- ei thlah taraw. Chahrasala a hmo hiapa pie veih ei.
4. Hâ chy te tahpa chyh-einazy, chapie aw vana tahpa Thlahchhâ chyh-einazy he kheih hawhta Khazohpa ta ei Thlahchhâna he eina chyh-ei tahpa eimâ pahno thei aw? tahpa bie hiahrina a y thei aw.

Eima Biehrai atlypa liata, Khazohpa khohnazie ta eima hia khihtala, ano lâta eima hmo hiapa cha eima hmô haw tahpa eimâ pahno a tah. Thlahchhâ chyh-eina cha Khazohpa khohnazi ta Thlahchhâna liata a châ. Khazohpa khohnazie ta Thlahchhâna cha, Zhn 15:7 liata, “Nâmo keima liata y thlaha pata, ei bie nâmo liata a y khihtacha nama Thlahchhâna chyh-ei pa a châ” aw tah ta, Khazohpa bietaihpa chôta aduapa ta Thlahchhâ awpa a châ.

Zm 4:3 liata, Thlahchhâ ei chita, chyh-eipa châ vei. Achhâpa cha nâmo sasyh phasana chôta nama hiapa vâta a tah. Chyhsapa liata sapa khohna nata phasana châta nama hiapa vâta a tah. Chyhsapa liata sapa khohna y ta, sapa, sasyh phasa khohna he Khazohpa nata azaona hnei vei tahpa eima novâhpa ta, eima Thlahchhâna cha Thlahpa khohna nata â hmie awpa a peimawh. Thlahchhâna liata hmeiseihna a peimawh hra. Nôpaw

2020 Apahrana Chhihthana Bu

liata hmo ahia thaipa maih thlah ama chhâ thai. Khazohpa bietaih liata a duapa ta ABeipa Zisu mohta ei hmô tlai aw tahpa tlokhû zona nata pathipalôh hmeiseihpa ta Thlahchhâna ta, thlah eima chha haino tlaita ei hmô haw tahpa alôhna maniah a pahneisa.

Pachâ awpa:

1. Thlahchhâ theileipa patypamânazy he Thlahchhâna asôhtuhpa vâta ahripa maniah a pabuana a chhâ thei hra?